

ASO GAFUA, 27 IUNI 2022

Na nofoia e le Fofoga Fetalai le Nofoa i le itula e 9:30 i le taeao.

Tatalo.

FOFOGA FETALAI: Ou te faasilasila atu ua amatalia nei Taulumaga a le Fono Aoaofa Fofoga.

Faafetai i le Atua ua mafai ona tatou toe feiloai i lenei taeao. O Lona alofa ua maleifua mai ai i le lagi e mama le paia o le tatou Maota, i le afio o lau Afioga i le Sui Palemia, faapea foi le afio o a outou Afioga i Minisita o le Kapeneta aemaise foi Afioga i Minisita Lagolago.

E faapea foi lea Itu o le malu, o lea e afio mai sui usufono mamalu o le Maota i lea foi Vaega mo le tatou Fonotaga. Ia o le mamalu lava lea aua le tatou Maota mai lava i ona maua seia oo lava i ona paia faale-atunuu ma mea uma.

Ia, ae ou te faatalofa atu i lenei taeao e faafeiloai atu foi i le Vasega o Ofisa Sili o Pulega o Matagaluga ma Faalapotopotoga Tumaoti a le tatou Malo. Malo le soifua manuia.

Le maimoa faafofoga mai a le tatou atunuu i ona tulaga faalupelupeina, e faatalofa atu lau Palemene i lenei taeao. Tapuai maia ma le manuia.

Le faaauauina o le tatou galuga i lenei taeao, ia o le tatalo lava a le Fofoga Fetalai, ia agalelei le Alii ma faamanuia mai. Ia manuia foi le usugafono a le tatou Maota, manuia foi le tapuaiga a si o tatou atunuu.

TULAFONO TAU FAAOFI O LE FAATATAUINA O TUPE FAAOPOPO (NU.2) 2021/2022 & TULAFONO TAU FAAOFI O LE FAATATAUINA O TUPE 2022/2023 – felafolafoaiga faaauau i luga o le faitauga faalua – Aso Fono Iona 5

FOFOGA FETALAI: E tolopo Galuga a le Fono Aoaofa Fofoga i le aso Faraile na se i mavae atu nei ua maea saunoaga a le sui usufono mo Anomaa 2 po o le Afioga foi lea i le Sui Taitai o le Itu Agai.

Ia, o le avanoa lenei e tuuina atu ai i lau Afioga i le Taitaifono o le Komiti o Tupe Maua ma Tupe Totogi mo lau saunoaga.

Afioga FALEOMAVAEGA TITIMAEA TAFUA (Taitaifono o le Komiti o Tupe Maua ma Tupe Totogi): Faafetai mo lou avanoa. Ua tatou auai faatasi e tusa o le taulaga na e siitia i lo tatou vatapuia ma le Atua lo tatou Matai.

Lau Afioga i le Fofoga Fetalai, faafetai mo lo matou avanoa. Ou te muai ufitia ulutao o Samoa aua e faigata o oe o le fatu e le gae, ua taoto foi a o se ia maioio o le moana. O ou sa ma faigata e le fagota sagolegole i ai se tautai, aua e faigata o oe o le ao mamala, o le ia iviivia ma le fue lavelave. Po o ai lava le tautai maemae, e le mafai ona atoa atu i lona sa, aua o oe Samoa ua maea ona sama sugalu ma tosia le taufa i le amata mai Saua seia paia Agalega.

Lau Afioga i le Fofoga Fetalai, avea ia lou leo e fai ma fofoga o le Komiti o Tupe Maua ma Tupe Totogi e faailoa atu ai i lau Afioga faapea foi le Afioga i le Sui Palemia, le mamalu o alii ma tamaitai o le Kapeneta, afifio Minisita Lagolago, afio le Taitai o le Itu Agai ma le mamalu ma le paia o sui usufono uma o lenei Palemene. Malo afua ailao ua maua.

E faatalofa atu i lau Afioga i le Loia Sili, ae a Ofisa Sili o Pulega o Matagaluga ma Faalapotopotoga Tumaoti a le Malo. E faatalofa atu i lau tofa i le Tootoo po o le Failautusi o le Maota ma le mamalu o le Ofisa o le Fono.

Lau Afioga i le Fofoga Fetalai, o le aso ma le filiga, o le aso foi ma le mataigatila, o ituaso o le filiafa ma le vaitau o le muliaa talele, o le tai ma lona taaga, ou te talitonu o lea ua i tala falesoa le taatiuga a le tautai o le namo. Ma e manatu foi ua toa le taililigo ina ua faaifo Tapuitema i lona tafatafailagi, e afua ai ona ou faatulou i le apoapogata o lenei Maota, o le Maota ma le malae o tia na faufau e aiga, aua Samoa ma ona upufai. E sesega laui'a i ai ao o le faasouga ae mapue faaauluauma i ai galu o le tai tafola.

Ou te faatulou i le tapuaiga mamalu a Le Ao o le Malo, le Afioga i le Tama a Aiga ma lau Masiofo, afio le Sui o le Fono a Sui Tofia ma lou faletua, afio le Afioga i le Faamasino Sili ma lou faletua ma le Ofisa o Faamasinoga, i le amata mai i le pulagavai nai le matavai o le Taisamasama, seia paia le ala i Fuiono e leleo e le amataitao ma le faaiuitao o taua, aua le afifio o Aiga ma Tama, Tama ma o latou Aiga, usoga a Tumua ma Pule, Ituau ma Alataua, Aiga i le Tai ma le Vaa o Fonoti.

O paia o le faigamalo a Tutuila ma Manua, aua le afio o le Kovana ma le Lutena Kovana, Peresetene ma le Maota maualuga, Fofoga Fetalai ma le Maota o Sui, Faamasino Sili ma le ituvaia o le Faamasinoga, aua le afifio o Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, Faatuiolemotu ma le Laau na Amotasi, Faleagafulu ma Tootoo o le Faleula, ma upu i le Manuatele.

I le filosofia masani, e toa le puao i tumutumu o le mauga, i fatulegae ma malotumau, o auauna totofi a le Atua i le afifio o Taitai o Ekalesia e fia i so o se fatafaitaulaga ma outou faletua, aua o le fuaga ma le foaga o lo o latou

ula le mulila ma tapuai tatalo mai aua faiva o lenei Palemene. E matua atu i ina i le Atua ma Lona finagalo ae taoama so matou faatauva. Tulou, tulou, tulouna lava. O lea ua atoa paega o lagi, ua taufai puea foi le tilafoa ma le ofeloa. Ona ou manatu ai lea, o le tala i le tafaoga a le tama o Fuaoletoelau, na ia tepa ane i lona titi, a, se pe le o lupe ea ia na vaoeseese o lea ua fuifui i lou titi. O lele ua nofoia pou o lauga i totonu o lenei Maota, ua atoa usu le naaloa, ua gase pule ae ola toa i le alofa ma le agalelei o le Atua i lenei taeo fou.

Ou te fia avea foi lenei avanoa ou te fia faatalofa atu ai i si ou itumalo o faafogafoga mai, Aleipata fale i lalo. E malosi le auauna pe a tapuaia faiva e ala i la outou tatalo. O se taimi ona oo atu lea o se faamatalaga i lo tatou itumalo, ae tapuai maia. E le gata i lea, ae o so o se Samoa o faafogafoga ma maimoa mai i so o se tafa o le lalolagi.

Lau Afioga i le Fofoga Fetalai, o lea ua folasia i lumamea le lipoti o taunuuga o iloiloga a lenei Komiti sa feagai ma le lauliliuina o le Tala Faatatau Autu o le Tupe mo le tausaga faaletupe 2022/2023 ma le Tala Faatatau Lona Lua o Tupe Faaopopo 2021/2022.

Lau Afioga i le Fofoga Fetalai, folau faatasi e faamaite le faatupulaia o le tamaoiga ina ia mausali mo le manuia o Samoa. O le vaogagana o faaeleleaga, a ua maea ona fafai le matavao, e faapefea ona toe faaolaola ma toe tapue tiapula iti e toe faatuputupu. Ona faapea lea, e toe autalu le vao sosolo ma sasala fue ua ola, ona toe polili faatasi lea i le matavao e toe vevele ma toe faasusu, ina ia toe faatutupu fua o faaeleleaga aua se mataiai o aiga, a o se fuefue e tua i ai aua aso leaga. O se uiga o se faamatalaga e amata ai se manatu, o le auga tonu lea o autu o taiala e i ai le Tala Faatatau Autu o Tupe o lenei tausaga, e toe tapue ma toe tau faaolaola le tamaoiga mai le tulaga pagatia ua i ai nei, e le gata ia Samoa ae o le lalolagi atoa.

O le Tala Faatatau Autu o le Tupe 2022/2023, o lo o atagia manino ai le ogatasi o ana fuafuaga alualumamao ma taiala mo le lumanai manuia o Samoa - Pathways for the Development of Samoa 2021/2022 e agai i le 2025 i le 2026, ina ia mautinoa le ausia o atinae ma taiala autu nei.

Muamua, faaleleia le atinae o le soifuaga lautele.

Lona lua, faalauteleina o le tamaoiga ma gafataulimaina.

Tolu, saogalemu ma le faatuatuaina o pulega lelei.

Lona fa, siosiomaga puipua ma suiga o le tau.

Lona lima, tulaga i galuega a le Malo ma atinae tetele.

O vaega taua foi nei sa fai ma faavae e limataitaiina ai saililiga a le Komiti o Tupe Maua ma Tupe Totogi i le lauliliuina o le Tala Faatatau Autu o le Tupe ua i le lumamea nei.

Lau Afioga i le Fofoga Fetalai, o se aotelega o le tamaoiga o le atunuu sa faaitiitia i le 7.4% i le tausaga e 2020/2021 ona o aafiaga o le Koviti-19 i luga o tulaga tau fefaatauaiga ma atinae tau tagata tafafao maimoa mai fafo.

O se vaaiga mo le tausaga faaletupe lenei 2021/2022 ua fuafua e toe faamauina ai se faaitiitiga e tusa ma le 3% o le tamaoaiga, ona o aafiaga lava o le faamai faatasi ai ma vavao sa faatinoina mai ia Ianuari seia oo atu ia Mati. O le maualuga foi o le tau o le soifuaga o lo o i ai nei, talu ai le siitia o le tau o le suauu ma isi oloa auina mai i totonu o Samoa o lo o fuafua e ono aafia ai le vave ona toe faafoisia le tamaoaiga i le maualuga sa i ai, ma aafia ai foi le vave faatupulaia o tupe maua a le Malo.

Lau Afioga i le Fofoga Featlai, ua i ai le faamoemoe e toe siisii malie ai i luga le tamaoaiga o Samoa e tusa ma le 0.06% i le 2022/2023 e ala i le toe tatalaina o tuaoi faava-o-Malo ma femalagaaiga i le va ma atunuu i fafo, faapea le toe faatupulaia o pisinisi ma atinae eseese sa aafia i tau faalenatura.

O lenei vaaiga taulai, o le a faamoemoe tele i le faatinoina manuia o atinae ma faiga faavae o lo o folasia i le Tala Faatatau Autu o le Tupe 2022/2023. O le matau, o le siitia o tupe a le Malo e uunaia ma toe fotuai alamanuia tau pisinisi ma tagata tafafao maimoa mai fafo, o le a mafai ai ona toe faamauina se siitia o le tamaoaiga o Samoa.

Faamoemoega autu. Lau Afioga i le Fofoga Fetalai, o le auga ma le faamoemoe atoa lea o le Tala Faatatau Autu o le Tupe, o le taumafai malosi e toe uunaia galuega faatino ma matafaioi a Matagaluega ma Faalapotopotoga Tumaoti a le Malo. O le taua ma le faamamafa o lo o lilifa lava i le tau o le soifua maloloina ma le itu tau aoaoga aemaise le atiaeina o tatou fanua ma eleele i nuu ma alaalafaga o le atunuu.

O le isi vaega taua na laga e le Komiti o le silasila lea i le suiga o le tau ma ona aafiaga. O se tasi lea o mataupu e i ai le manatu o le Komiti o lo o laualuga i mataupu tutoa e ave i ai le faamamafa a le tele o atunuu o le lalolagi, ma e alagatatau ai foi ona mulimulitaia ma faatauaina e si o tatou atunuu.

Lau Afioga i le Fofoga Fetalai e pei ona silafia e lenei Maota, e taotolua le seuga i le Lipoti a lenei Komiti, o lo o aofia ai foi ma Tala Faatatau o Tupe Faaopoopo Lona Lua 2021/2022. O le faatumauiina pea o le auaunaga ma le mafai ona tali atu i aafiaga o lo o feagai pea ma le atunuu ona o le faamai o le Koviti-19. O le naunautaiga o le Malo, ia faaauau pea ona faatino ana atinae ma auaunaga masani aemaise fuafuaga alualumamao, aua le faatumauiina pea o le sologa lelei o lona tamaoaiga, a o le i faaiuina le Tala o le Tupe o lenei tausaga faaletupe 2021/2022.

E \$11.6 miliona vaegatupe faaopoopo i lenei Tala Faatatau Faaopoopo i Matagaluega e 3 mo le faaauauina o ana galuega faatino, a o le i faaiuina le tausaga faaletupe o lo o faatupeina nei talosaga i le fetuunaiga o tupe alu mai le Matagaluega o Faatoaga ma Faiga Faiva ma le Ofisa o Pule ma Suetusi Sili. E le gata i lea, o lo o faamauina foi le faasiliga o tupe maua mai tufatufaga dividends e \$7 miliona, faapea le faasiliga o tupe faameaalofa mai paaga e \$28 miliona. O lo o faamauina foi le faaitiitia o tupe maua e ala i le faamagaloina o tupe masani aoina mai le tau o le eletise a le Faalapotopotoga

o Malosi Tau Eletise. E \$12.8 miliona le tupe faameaalofa mai le Faletupe o Asia ua le mafai ona tuuina mai i totonu o lenei Tala o le Tupe i lenei tausaga ma o lo o faamoemoe e faamatuu mai i le tausaga faaletupe o lo o lumanai nei.

Lau Afioga i le Fofoga Fetalai, o se aotelega o sailiiliga a le Komiti ua mafai ona otooto auiliili atu i lenei Lipoti e ala i ana faatalatalanoaga ma Matagaluega ma Faalapotopotoga Tumaoti uma a le Malo o lo o faatupe atu i le Tala Faatatau Autu o Tupe mo le Tausaga Faaletupe 2022/2023.

Otootoga o nai tali atu i fesili e pei ona fesiligia e nisi o sui usufono, e maua i la outou faafofoga sa faapea lava ona tapa e tali atu e au nei. Tuuitiitia i le Tala o le Tupe i le Pulega o Tagata Tafafao Maimoa Mai Fafo. E tusa ai ma faatalatalanoaga sa faatinoina e le Komiti ma le Pulega, sa faailoa mai ai le tusa ma le \$11 miliona o tupe faasao a le Pulega o lo o i ai nei. O nei tupe faasao, e afua mai ona o le tele o a latou polokalame ma atinae, galuega faatino na tolopoina ona o le Koviti-19. O lona uiga, e tusa ma le \$20 miliona se vaegatupe o le a tapena ai nei le Pulega mo le toe tatalaina o tuaoi faava-o-Malo. E \$9 miliona o lo o i ai i le Tala Faatatau i le tausaga fou, ma le \$11 miliona o tupe faasao.

Tuuitiitia i tupe faameaalofa mai fafo. E i ai sui usufono na afea lenei mataupu e faailoa mai le latou popoe i le tuuitiitia o atinae ma tupe faameaalofa mai fafo. E i ai poloketi tetele a le Malo ua faamaeaina e tusa ai ma le saunoaga a le Afioga i le Minisita, faatasi ai ma nisi o atinae ua amata ona faaiuiu. Peitai, o le tele foi o nisi atinae ma poloketi tetele o lo o faatalanoaina ma tau faamautu e le Matagaluega o Tupe ma paaga mo atinae masani a le Malo.

Tuuitiitia o tupe faamatuuina atu i le SWA ma le EPC, Ofisa o le Vai ma le Ofisa o le Eletise. O vaegatupe a le SWA o lo o folasia i le Tala o le Tupe a le Matagaluega o Galuega, Felauaiga ma Atinae Tetele, o le sao lea a le Iuni a Europa i le Vaega Maoti o le Suavai. E mo le silafia, o le tausaga e 2019/2020 na gata ai le fesoasoani masani lea a le Iuni a Europa po o le EU, talu ai le le mafai ona faataunuuna o le fonotaga tele lea sa fuafua e faatalanoaina ai le isi vaega o lenei fesoasoani talu ai le Koviti-19. A o talia nei faatalatalanoaga sa tauave lava e le Matagaluega o Tupe nei atinae. O le masina o Me tausaga 2022, na mafua ai loa ona faamautu le faaauauina o le fesoasoani a le EU, ma e tusa ma le \$8.4 miliona lea ua faamatuu mai ma o lo o folasia i le itulau faa-Roma XVI o le Tala i le Tupe. Mo le silafia e lenei aofia atoa, o lo o faatino ai uma lava atinae mo le vaega maoti o le suavai, e aofia ai punaoa faalenatura o le suavai, suavai lafoai se i tulou, suesuega o vai tuufagu aua le fofoga taumafa o le atunuu, atinae o vai tumaoti, o alavai, faatasi ai ma le faaoo atu o le suavai i aiga, lea e faatino e le Ofisa o le Vai.

Ua faailoa mai e tusa ai ma faatalatalanoaga a le Komiti sa faatinoina, e pito i tele lava le sao mai vaegatupe a le EU, lea e faamatuu atu i le Ofisa o le Vai. O le naunautaiga, o le a taumafai lava e fetuunai galuega ma isi

vaegatupe a le Pulega aua le faatinoina manuia o a latou galuega i le tausaga o loma nei.

O le EPC. E tusa ma le saunoaga a le Afioga i le Minisita o Tupe, e i ai vaega, ma o lo o fuafua o le a mafai ona aoina mai i le EPC, ma o le a avea ma faamama avega mo le tausaga faaletupe o lo o loma nei. Ua faailoa mai i le Komiti o lo o i ai lava le avanoa e toe iloilo ma faatalanoa ai le tulaga mo CSOs a le EPC i le tausaga faaletupe o lo o loma nei, ina ia mafai ona fesoasoani atu i ai le Matagaluega o Tupe.

E pei ona silafia, e 3 ituaiga Faalapotopotoga a le Malo o lo o i ai nei, o le mutual beneficial bodies, o Faalapotopotoga faavaeina faaletulafono e faatinoina se auaunaga ma ni teugatupe e tusa ai ma latou tiute faaletulafono, ma e aofia ai le ACC, o le NPF ma le SLAC. O le public beneficial bodies o Faalapotopotoga faavaeina e faatinoina se auaunaga mo le mamalu o le atunuu mo latou. E le manaomia ni a latou polofiti po o ni a latou tupe faasili, a o le latou matafaioi, o le auaunaga i atinae o le atunuu, faatupeina i lena atoaga o le Matagaluega o Tupe.

E 10 beneficial bodies a le Malo, ma e aofia ai le LTA, o le National Kidney Foundation, o le FESA, NUS, o le SQA, STA, SROS ma le Pulega o Petipetiga po o le Gambling Control.

FOFOGA FETALAI: Ia, na o se fesoasoani a le Nofoa i lau Afioga i le Taitaifono, e manatu foi i le tulaga o au saunoaga ma le faamalamalamaina o le tou Lipoti, ia e manatu lava foi lele i lona aoatetelega. O le auiliiliga, ia e i ai se taimi ona tatou oo lea i le auiliiliga o mea taitasi, ae saunoa pea faalauaitele i sailiga a la outou Komiti aua le tamaoaiga o le atunuu ma le tou tapenaga, ae o lo o i ai le avanoa tatou te oo atu ai foi i mea taitasi, ina ia faafaigofie ai foi lau galuega lau Afioga i le Taitaifono.

Afioga FALEOMAVEGA TITIMAEA TAFUA: Lau Afioga ona e talu ai, sa i ai lava nai sui usufono sa faapena ona fesiligia le Komiti, lea e taumafai ai e avatu nai tali nei. Ia, lea o lea ou see mai i le faatupulaia o tupe faaletulafono.

Afioga Lupematasila Galumalemana Tologata Togia Tile Leia (Falelatai ma Samatau): Lau Afioga i le Fofoga Fetalai...

FOFOGA FETALAI: Ia se i tulai mai le sui usufono o Falelatai ma Samatau.

Afioga Lupematasila Galumalemana Tologata Togia Tile Leia: Faafetai i lau Afioga i le Fofoga Fetalai. O lea e matau atu o le a see ese le Afioga i le Taitaifono mai le mataupu lea o CSOs. Ae na ona fia faafesili atu lava i le Afioga i le Taitaifono, pe le i oo se sailiiliga a la outou Komiti aua

o lea e matau atu na o le \$1 miliona lea e ave i le EPC, ae pe fia ni arrears o pili o street lights o lo o i ai. Aua o le talitonuga lava lea e i ai, e le taitai ona gafatia e le \$1 miliona lea ona totogi aitalafu o le pili o lo o mumu ai moli o le aualatele. Ma le faaaloalo.

FOFOGA FETALAI: Ia, e manatu i le faafesili a le sui usufono mamalu, e talitonu e maua le avanoa pe a auilili mea taitasi ona maua lea o le avanoa, e tuu atu foi avanoa e lua i lau Afioga pe a faafesili i le tulaga lea, ina ia faagasolo pea le saunoaga a le Taitaifono ia faalauaitete, ae e i ai lava le taimi. Tatou te o foi i mea taitasi pe a uma ona... ona tatou oo lea i le auililiga. Faaauau lau saunoaga lau Afioga.

Susuga Hon Laauli Leuatea Polataivao Fosi (Minisita o Faatoaga ma Faiga Faiva): Lau Afioga i le Fofoga Fetalai o le tulaga lava ina ia manino ma malamalama le folasaga a le Afioga i le Taitaifono, leaga o lea e matau atu o le a amata ona fesili sui usufono o le Maota i mea e le i laga i a latou lauga, ae tuu pea le avanoa se i saunoa le Taitaifono. O la e manino lana folasaga i tulaga aoatetele o lo o faamalamalama ai. Ae o le toe oso lea o ni fesili fou, e le tusa ma le tatou Tulafono Tumaui. O le faamanatu lena i le tatou Maota ina ia manino ma malamalama i ai, o lea e faasolo mai ai le saunoaga a le Taitaifono. Ae lafo atu pea o lena e i ai le tofa i lau Afioga i le Taitaifono i mea e te tali i ai ma mea e te le tali i ai.

FOFOGA FETALAI: Faaauau le saunoaga lau Afioga i le Taitaifono.

Afioga FALEOMAVEGA TITIMAEA TAFUA: Ia faafetai, o le tulaga tonu lava lena o lea sa tau avatu ai se faamatalaga. Lau Afioga i le sui usufono mamalu, o lea e te faafofoga mai, o lea ou te talitali atua fesili a sui usufono mamalu na afea i le fia malamalama. E le i lavea mai ai i lau saunoaga ia le tulaga lea. O lea o le a faaauau ai pea se faamatalaga. O lena e pei ona saunoa atu le Fofoga Fetalai, e i ai ou avanoa e lua i taimi o auililiga, ona maua ai lea o lou avanoa ma le faaaloalo.

E pei ona masani ai, o tupe nei, e le masani ai ona iloilo ina i totonu o le Palemene aua o tupe faatulafonoina. Ae peitai talu ai na laga ma fesiligia e se tasi o sui usufono, e ao lava ona tuuina atu i ai sina faamatalaga puupuu lau Afioga. O le siitia o tupe totogi mo aitalafu, debt servicing, ua ala ai ona faatupulaia nei vaegatupe mo e tausaga fou 2022/2023. E pei ona silafia o le tausaga 2020/2021 lea na faatinoina ai se faamama avega a atunuu tetele e 20 a le lalolagi, o le G20, lea na tuusaunoa ai le totogiina o aitalafu mo atunuu uma lea na aofia ai ma Samoa. E lua tausaga na faamanuiaina ai Samoa i lenei fesoasoani. O le tausaga fou o le a toe foi ai tulaga o le totogiina o aitalafu a le Malo, i le tulaga masani sa i ai. Ua maea nei le fesoasoani na taua o le Debt Servicing Suspension Initiative. Na laga foi

vaegatupe faatatau o totogi o sui usufono e se tasi o sui, e faapea e le tatau ona tuutiitia e tatau ona siitia.

Lau Afioa i le Fofoga Fetalai e pei ona silafia, o le Tala Faatatau muamua o le Tupe lea na i ai vaegatupe faaopoopo aua totogi toe fua i tua back pay, mo nisi o sui usufono o le Palemene, e tusa ai ma faaiuga a le Faamasinoga Maualuga ma le Faamasinoga Apili. O lea ua maea ona totogi nei vaegatupe ma ua toe faafoisia totogi i le tulaga masani, ma ua aofia ai ma Nofoa faaopoopo. O lo o aofia i le Tala o le Tupe ma sa faatalatalanoa foi ma Matagaluega o le a taimua ai nei fesoasoani, o le a faatinoina i le Tala Faaletupe o lo o loma nei, e aofia ai le \$2.5 miliona, e fesoasoani mo le atinae o tagata tafafao maimoa mai fafo. O lenei vaegatupe, o le a faatinoina faatasi e le Pulega o Tagata Tafafao Maimoa mai fafo ma le Matagaluega o Tupe. Ma o le a mulimulitai pea i faiga faavae o lo o faatinoina ai le fesoasoani. E \$5 miliona mo le tausaga nei lea ua faamanuiaina ai Atinae tau Faletalimalo, Ofisa malaga ma isi auaunaga, tour operators e silia ma le 160. E \$3 miliona se fesoasoani mo pisinisi laiti e tauala atu i le Samoa Business Hub. O lenei fesoasoani o le a faamatuina atu i pisinisi laiti, le faatalosagaina o se fesoasoani tau seleni e toe faaleleia ai ma toe faalauiloa ia latou auaunaga ma oloa aua le tapena atu mo le toe tatala ai o femalagaaiga.

O le \$5 miliona se fesoasoani faaunegatupe, e faatino lea e le Faletupe o Atinae. O lenei fesoasoani o le a mafai ai ona faatino ai nonogatupe mo nisi atinae ma pisinisi e manaomia le seleni e toe faaleleia, ma faalauiloa ai a latou auaunaga ma oloa. Ua faailoa mai le laititi o tului o nei nonogatupe, e na o le 3% faatasi ai ma nisi o tuutuuga e faafaigofie ai ona maua e tagatanuu o Samoa lenei faamanuiaga. Na fesiligia e le Komiti lenei vaega, tuutiitia vaegatupe mo falemai o itumalo mai le \$3 miliona i le na o le \$1 miliona. Na fesiligia e se tasi o sui usufono, ma na tapa e le Komiti, ma sa faailoa o vaegatupe e \$3 miliona o lo o i ai nei, mo le tausaga faaletupe 2021/2022, o lo o faaagaga lea mo le faaleleia o falemai o itumalo, ma e aofia ai ma faleapitaga mo fomai. O le taimi nei, o lo o taufaagasolo pea tulaga o tauofoga ma o le a faasee atu lenei vaegatupe e faaauau ai nei galuega, i le tausaga faaletupe 2022/2023. O le toe fetuunaiga o le \$3 miliona lenei i le tausaga fou, ua tauaveina nei, e \$1 miliona i le toe faaleleia o falemai i itumalo, \$1 miliona mo faleapitaga o fomai o le a tautuaina nei falemai.

O vaegatupe sa faatatauina i lalo o le Tala o le Tupe i lalo o le Soifua Maloloina e aofia ai taumafataga, vailaau ma isi. E tusa ai ma faatalatalanoaga sa faatinoina ma le Matagaluega, o nei vaegatupe ua faasee atu i lalo o vaegatupe faatatauina o vaega taitasi a le Matagaluega, ia mafai ai ona mataitu lelei e Faauluuluga o nei vaega a latou tupe, faatatauina aua auaunaga i le mamalu o le atunuu. E le o aveesea mai le Tala o le Tupe, a silasila atu i ai le sui usufono mamalu mai Gagaifomauga 1, i le aotelega o tupe faatatauina mo nisi o Vaega a le Matagaluega o le Soifua Maloloina, ona matauina ai lea o se siitaga, ona o nei vaegatupe.

O le tuutiitia o tupe faatatauina mo gasegase auina i fafo. Na fesiligia foi e se tasi o sui usufono, ma sa iloiloina e lenei Komiti vaegatupe ma sa faailoa mai. O le tausaga faaletupe o lo o faagasolo nei, na aofia i tupe totogi mo lenei polokalame le faanofoesea lea o gasegase i le faatoa taunuu i Niu Sila. Mo le taimi nei, mo le silafia o lea ua tatala le feoaiga i le va o Niu Sila i le lalolagi atoa. O lona uiga ua faaitiita ma faasaoina mai nei vaegatupe. A faaaauau pea le latou galuega, o le Matagaluega o Tupe, o le a faaaauau pea le latou galuega aua le mataituina lelei o nei tupe alu a le Malo.

O foreign reserves, lea na fesili ai foi se tasi o sui usufono mamalu, e mo le silafia o le tatou foreign reserves e \$774 miliona o i ai i le taimi nei. O mea ia o foreign reserves e i ai lava... pei a fai le kalafa foi lea, e na o le 4 lava masina e tatau ona aafia i totonu... ae peitai ane, toetititi faatoluina le tatou... ia malilie sui na fesili i ai, o lo o lava ma totoe. E so o se atunuu lava o lo o faapena lava a latou tapenaga ma le vaai mamao, i le lelei mo atinae.

Ona ou oo mai lea i le miliona lea na fesili ai se tasi o sui usufono. O le tupe lea na ave i le Sports Development Fund. E mo le silafia e lau Afioga, o lea ua sii le vaegatupe lea i le \$2 miliona, e le o aveesea. O lea ua sii i le \$2 miliona ae ua ese le vaega lea ua avatu i ai, ua avatu lava i le vaega lea, i lalo o le Minisita o Aoga, ia le \$2 miliona. O a lava vaega taaalo uma po o a ituaiga taaloga e fia talosagaina, ia ona talosaga sao lava lea i lalo o le Matagaluega lea, ma le agaga faaaloalo.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, ona e pei o au lea sa ou fesili tonu i le vaega lea i le lauga faalauaitele.

FOFOGA FETALAI: O lea ua e faafofoga atu i le sui, o lea ua tali manino mai o la e i ai, o le a la le isi mea lena e toe faafesili ai lau Afioga.

Tofa Hon Lauofo Fonotoe Nuafesili Pierre Lauofo: O lea la ou te fia malamalama atili, i le tulaga lea... aua o le mea lea sa i ai, sa aumai maoti lava le igoa o le Faalapotopotoga o Taaloga, aua e masani ona tuuina atu le talosaga a Faalapotopotoga i se vaegatupe tau fesoasoani mo le latou tausaga taalo, ona fuafua lea i ai le faasoaa a le Matagaluega. Ae peitai e pei o lea ua aumai atoa lava le vaegatupe ae le o maoti la po o le a le faasoasoaina o lea vaega.

O le vaega lona lua, manu o lea lava e i le Matagaluega o le Soifua Maloloina, sa taua le tupe lea ua tuutiitia le tupe mo falemai faaitumalo ma sub center i tua a tatou. A o lea ou te vaai atu o le vaegatupe tau personnel, tagata faigaluega, o lea la e pei e foliga mai, ua tuutiitia mai, a le o totogi ua aveese polokalame, po o ni totogi o ni tagata faigaluega, po o ua vaea pe faamalolo nisi. Aua o tulaga tonu o totogi lea e aumai ai le tupe lea, e le o aumaia i le faaleleia o falemai. Ma le faaaloalo.

FOFOGA FETALAI: O lea ua maua lou finagalo, faaauau le saunoaga, o lena lava ua saunoa lau Afioga i le tulaga ua i ai.

Afioga FALEOMAVAEGA TITIMAEA TAFUA: Lau Afioga i le Fofoga Fetalai mo le avanoa, mo le silafia e lau Afioga e pei ona ou taua, o le \$2 miliona lea, sa ave seleni ia e na o le miliona i faalapotopotoga o taaloga taitasi nei. Ae o le taimi nei, ua ese foi le vaaiga a le Malo ia, o lea ua faaopoopo i ai le isi miliona, ae ua tuu i totonu o le vaega lea, a manaomia ona talosaga lea i ai o so o se taaloga, lea ua toe faaopoopo, ua toe siitia i le \$2 miliona. Ae a faapea e toe fia malamalama atili, o lo o i ai le avanoa e toe fesili ai i mea taitasi.

O le isi au fesili i le vaega lea...

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, ona o le fia malamalama atili lava. E pei o lea ua aumai aofai foi lea i se tulaga o se tupe... \$2 miliona, e pei o le mea lea sa tulituliloa atu, ona o lea e taufesili faalapotopotoga a Aoga, pe agavaa latou pe leai. O le mea sa i ai muamua, sa i ai lava le vaega e ave i lakapi, sa i ai vaega e ave i le Netball ma isi faalapotopotoga tau taaloga. O le mea lea e i ai, e pei ua faailoga fesili foi lea le tulaga ua i ai. E pei ua fesiligia la lau Afioga ma le tou Komiti i le Matagaluega i se faasoa o fuafua mo ituaiga taaloga eseese.

FOFOGA FETALAI: Se i tulai mai lau Afioga i le Minisita o Pisinisi ma Alamanuia.

Tofa Hon Leatinuu Wayne Soialo (Minisita o Leipa ma Fefaatauaiga): E faafetai lava mo lou avanoa, ae e fia fesoasoani atu mo taaloga, a o le aua taua ai le lakapi. E pei ona silafia foi o lo o faaauau lava le fesoasoani lea a le Gamboling Control, o lo o i ai le fesoasoani o lo o ave i le lakapi e \$500,000 i le 2018. E ma o lo o togitogi pea i le taimi lenei, o lo o totoe ai nei le \$350,000 o lo o mafai ona ave i le lakapi. O isi taaloga, o lo o aumai sao lava a latou talosaga i i foi i le Gambling Authority. É le gata i lea, o lo o i ai foi a latou talosaga i le SIFA, maua se fesoasoani mo taaloga ia. O lea foi o lo o aumai i le Kapeneta, ma avatu ai le maliliega a le Kapeneta, mo le tufatufaina o seleni ia, ina ia mafai ona fesoasoani atu ai, ae ese mai le \$2 miliona lea o lo o ave i le Matagaluega o Aoga e fai ai foi isi...o lona uiga o lo o tele lava avanoa, e mafai ai ona fesoasoani atu mo taaloga eseese. Pei o le fesoasoani atu lea ma le faaaloalo.

FOFOGA FETALAI: Ia malo faafetai saunoa i lau Afioga i le Minisita. Se i tulai mai le Afioga i le Minisita o Faatoaga.

Susuga Hon Laauli Leuatea Polataivao Fosi: E tulai atu lava e faamalamalama atili le saunoaga a le Taitaifono. O le taunuu mai o le tatou Faigamalo fou, o lo o taufaatulaga ai le mea lea e tupu i le taimi lenei i mea tau taaloga. O lo o nafa nei ma le Minisita o Aoga, i le mea lenei o le omai salalau o itutino uma o taaloga i le atunuu, ua le iloa po o fea e taula i ai. ua tuu le SASNOC sa tatau ona sau uma i ai talosaga o mea tau taaloga, ae ua sau lava le taaloga ia, ma le Federation ia, o le faafitauli lena o lea e tupu nei i totonu o le Kapeneta. Ma ua uma foi ona fai le talanoaga o le a ave le galuega e tau faatulaga ai le mea lenei, ina ia tasi le avanoa, tasi le auala e sau uma ai talosaga a Federation taitasi. O le taimi lenei, e o agai i o i le Ofisa o Aoga, omai i i, i le taaloga o le Tattslotto. O lo o faapena ona le manino i le taimi lenei. Ae malilie sui usufono, o lea e agai le Kapeneta i le taimi lenei, ma le faagasologa o galuega e pei ona tau faamalamalama atu e le Afioga i le Taitaifono, se i tau fai se alafua, ina ia taatia i le lagatonu le mea lea, aua le omai salalau. E le tasi se taaloga a le atunuu, o lena e tou te silafia, ae o lo o taumafai e tuu i le faavaa e tasi, ona faigofie loa lea ona tofufusia ma paleni le faasoa, aua ne i tele isi ae leai isi. E pei o le faamalamalamaga lena o lea e tau avatu e le Taitaifono.

FOFOGA FETALAI: Malo faafetai, ou te iloa ua manino lea mataupu. Se i tulai mai lau afioga i le Minisita o Aoga.

Afioga Hon Seuula Ioane (Minisita o Aoga): Sa manatu lava e tuu pea le avanoa se i saausi le tatou mataupu aua o lea e i ai le avanoa matou te tali atu ai, ona faamanino atili lea o ia fuafuaga.

FOFOGA FETALAI: Faaauau le saunoaga a lau Afioga i le Taitaifono, o lena e manino lava mea uma. Faaauau le saunoaga.

Afioga FALEOMAVAEGA TITIMAEA TAFUA: E faafetai atu o lea o le a oo i le taimi e tali atu ai Minisita ona tali atu ai lea o nisi o vaega. Ae se i tau faauma atu lava si faamatalaga lea le Sui Taitai o le Itu Agai. O le \$2 miliona lea e pei ona e fesiligia, mo lou silafia, so o se taaloga lava e i ai faaiuga, e manaomia results. O nisi foi na o tulaga na tilotilo i ai le Malo i le mafuaaga lea, ae o le a ou seeese ma lena tulaga.

O le tatou faamama avega o lea e faatino nei e le EPC ma le SWA, ou te manatu e leai lava se Samoa e le o faamanuiaina i le tulaga lea, pe a ma se 99% o tagatanuu Samoa o si o tatou atunuu ua maua nei faamanuiaga. O lona uiga e tasi lenei faamanuiaga taua ua aafia uma ai lo tatou atunuu i se taumafaiga na faatinoina e le tatou Malo. Ona maea ai lea o fesili na tuuina mai e le mamalu o sui usufono mamalu o le Palemene.

Ou te manatu o le a se i ou oo i lou itumalo. Ia, e le toe i ai ni faamatalaga e toe faaleo ai ni manaoga o si ou itumalo, aua ua maea ona faaleo e se tasi

o sui usufono, si ou tuafafine lea ma te toalua nisi o vaega taua. E faapea foi ma le sui usufono mamalu mai le fale i luga. Ae ia na o se faamanatu o vaega taua e ave i ai le faamuamua. E muamua lava o le soifua saogalemu. Ua faamalo faafetai i lau Afioga i le Minisita i le auala laupapa po o le ford lea e i Tiavea, ua malo lava faafetai. Ua faafetai foi le tali mai, o lena ua maea ona faatino uma faailoilo ma speed humps e faalemu ai taavale, ae le i oo atu i ai. Mo le silafia o lea foi ua i ai le naunautaiga o lenei itumalo, e vaavaai uma mea totino nei, ina ia aua ne i toe vave faaleagaina. Ae mo le silafia ua uma ona ou talanoa atu i lau Afioga i le Minisita, o lena foi ua e saunoa mai, o le a faatino i se taimi nai a matou galuega nei, e pei o le aualagalua i Satitua, aualagalua i Amaile faapea foi auala tuua nei o Utufaalalafa ma Lotopue. E masalo e ioe ma talitonu i le fesoasoani a lau Afioga e faatino ai nai vaega ia. E na ona toe faaopoopo atu lava o le vaega lea, o le va o Lotopue ma Malaela, ua aia mai lava i le sami. E le o toe ofi ai ni taavale se lua, se i tagai ane i se vaega e mafai ai na toe vave foia ai le tulaga lea o le aia lea, ina nei i ai foi ni faalave lave e tulai mai ai, ma le agaga faaaloalo.

E le o le tolaulau o manaoga e taua, a fua lava i le faasoalimalima lelei a outou o Minisita, o le utiuti o le seleni, o le mafuaaga lea ua faagata mai ai manaoga o lenei itumalo mo lenei taimi. Faafetai.

Se i ou oo ane i le tapuaiga a le Aiga Sa Levi, susuga i auauna tofoti a le Atua. So o se Fatafaitaulaga o lo o faia le faiva o le tatalo ma faanonomanu aua se manuia o si o tatou atunuu, lo tatou itumalo. Ae faafetai mo le tapuaiga.

Le paia ma le mamalu i le afio o lau Afioga i le Tuiatua na faanofonofu, afio Alalaimalae, afio le Alii o le Itu ma le tane o le Itu. Pule na tatai i Lalovi ma Malaefono ma le Lauti na Laulelei ia te oe Saleaamua. O paia na ma mamalu o si ou itumalo, i le amata mai i Satitua, Malaela, Lotopue, Mutiatele, Saleaamua, Utufaalalafa, Samusu, Amaile ma Tiavea, ua malo le tapuai.

Se i fai se faafetai puupuu i le faiaoga o le tatou au taitoafitu. Lau Afioga Muliagatele Brian Lima ma Tausa Faamaoni Lalomilo, aemaise le pulega o le tatou au taitoafitu, kapeteni alo ma fanau. Aua ne i faamuamua sou tau, ae vaai po o le a sau tautua ua fai i lou atunuu. Aua ne i galo ia te oe, o le taleni o faamanuiaga mai le Atua. Se i tautuana tuu i ai atoa lou faamaoni. A ia te oe faamanuiaga a le Atua, e le gata ia te oe, e oo atu lava i alo ma fanau. O le mau a se tasi o Perofeta o Ieremia, ae e te le i fanau mai, ua silafia e le Atua lou tagata ma le faagasologa o lou olaga. Ia tautuana, ia faaoga tatau le taleni ua foaina e le Atua. Ia manuia a outou tapenaga mo le vae mulimuli o le taamilosaga.

E le faaititia foi le faafetai faapitoa i tamalii o lo o fesoasoani malosii i le tapenaga o le tatou au. Le afioga ia Tuaepepe Jerry Wallwork, ae a si ou tama faiaoga o Seiuli Paul Wallwork, o lo o lagolago malosii, e le gata i le lakapi, ae faapea foi le siisii uaea mamafa. A o le faufautua i so o se taaloga.

O le aua faitau si o tatou atunuu i pine auro i taaloga laiti a le Pasefika, faamalo i le ausiisii mo pine auro ma tatou afeleti ma isi taaloga. Ua malo le tau, malo le tauivi, faafetai le tautua ma le faaeaea atunuu. Ou te faailoa atu foi, o si o tatou atunuu i fafo e leai lava se taaloga e aupitosili ona tele le mileage ma le coverage, e pei o le lakapi ma le siisii mea mamafa. E leai, e ao lava ona lau Afioga i le Minisita o Tupe, se i toe faaopoopo ane nai seleni i si vaega sia.

E faafetai faapitoa i lau Afioga i le Minisita o Tupe mo le tapenaina o le Tala o le Tupe 2022/2023 aemaise o le Ofisa Sili o le Pulega ma le Matagaluega.

Lau Afioga i le Fofoga Fetalai, ona pau ai lea o se faamatalaga, e i ai le manatu o lea ua taoto lava le vai faafulu ma le vai ta ina ua lomaloma mamalu o matauli i le tofi, e pei o faiva mamalu o Sua. E momoli atu ai se faafetai a lenei Komiti i Matagaluega uma ma Faalapotopotoga Tumaoti, ae a e sa auai i le lauliliuina o le Tala o le tupe. O sui o le Matagaluega sa tofia e avea ma fesoasoani i la matou Komiti, a o faagasolo ana iloiloga ma sailiiliga. E faafetai i le Ofisa o le Tupe, faapea foi le Suetusi Sili ma le tuuina mai o se tasi o Suetusi i totonu o la matou Komiti, faapea foi ma le PSC malo lava faafetai. E faafetai mo lo outou sao taua aua le atinae o le tamaoaiga o si o tatou atunuu. Ia faamanuia le Atua i la outou siva taufai.

E fia momoli foi le faafetai i sui usufono uma o lenei Komiti, i le faatuatuaga i lou faatauavaa, e avea ai au ma Taitaifono, e suitulaga i le sa ave ma Taitaifono, ua fai i lagi lana tuligasia, le afioga ia Vaele Paiaaaua Iona Paiaaaua Sekuini. Faafetai mo le taimi atoa na faagasolo ai a tatou iloiloga. E muliaa se faafetai i le Ofisa o le Failautusi, mo le tausiga ma le tautuaina o lenei Komiti a o feagai ai ma lenei galuega tele. E le faaitiitia le faafetai ma le faamalo i susuga i le alii ma le tamaitai failautusi o la matou Komiti. O le susuga ia Erosi Korua ma Fausaga Talalelei Afaese, faafetai faamalo le tautua nofo tuavae, faamanuia le Atua.

E so o se Samoa o faafofoga mai i so o se itu o le lalolagi, faamanuia le Atua i lau tapuaiga.

E faamalulu atu foi, o le a se leo ua lagavale, ia malu ave i fale, i outou finagalo, e le asa lava se faiva ma se maumau.

O le faigamalaga a le Tamaitai Palemia, ia tau ina puipia ala o le ea o lo o faapena ona talii mai ai le faigamalaga. Ia faamanuia le Atua i lau Afioga i lau Afioga i le Sui Palemia ma le Kapeneta, afioga i Minisita Lagolago, Sui Taitai o le Itu Agai, ma le mamalu o sui usufono uma o lenei Palemene. Ia sili ona maua le malosi o lau Afioga i le Fofoga Fetalai, ae matou ola i le alofa ma le agalelei o le Atua. Ia soifua ma ia manuia.

FOFOGA FETALAI: Ua faamalo saunoa, faafetai i lau Afioga i le Taitaifono. O lea foi ua manino le paia o le Maota, aemaise o le faafogafoga mai o le atunuu, e tusa ai foi o la outou Lipoti auilili, aemaise foi o nisi o

mataupu sa laga e sui usufono mamalu. Faafetai o lea lava ua maioio le saunoaga, ma ua manino foi. E talitonu foi, a o i ai lava ni mea o totoe, o lea o le a tali foi le tatou Malo, aemaise foi o le taimi e auiliili ai le tatou Tala o le Tupe, ia o i ina o le a maua ai foi isi avanoa mo le faaalateleina o outou finagalo. Ua malo saunoa i lau Afioga i le Taitaifono, malo foi galue i la outou Komiti, e le mama la outou galuega. O lea foi ua oo le faafetai i Ofisa Sili o Pulega o Matagaluega ma Faalapotoptoga a le Malo aua le latou fesoasoani, ia e talitonu ua lagona foi le agaga faafetai i lenei aso, ona o fuafuaga taua, aemaise o le taumafai e faamanino mea uma e tuu mai i le Maota. O le mea lea faafetai saunoa i lau Afioga i le Taitaifono.

O lea foi ua oo le saunoaga i lakapi aemaise o le tai toafitu, ia malo lava faafetai. O lea foi ua ave lau talosaga i le Minisita o Tupe, atonu o lo o faafogafoga mai foi, maua pea lo latou lotu tetele ma le onosai ma tauivi aua lava le igoa tauleleia o si o tatou atunuu. Malo faafetai.

O le taimi lenei ua maea le saunoaga a le sui usufono, ma ou te talitonu lau Afioga i le Sui Palemia, o le a lafo atu ia i lau Afioga mo se faasologa i le tali a le Malo aua mataupu sa laga e sui usufono mamalu. Lau Afioga i le Sui Palemia.

Afioga Hon TUALA TEVAGA IOSEFO PONIFASIO (Sui Palemia):

E faafetai tele i lau Afioga i le Fofoga Fetalai o le fonu a Samoa i lenei taeao. Ua maea foi ona e momoli lapalapa o Malo e sulaina ai le alofa saili mai o lo tatou Matai Sili i le lagi, e pei ona e alagaina i lenei taeao. O la matou tatalo ia mana pea lau upu aua le viiga o le Atua, aemaise o le faatautaia o le Fonu a Samoa, pei ona e tulai mai ai i lenei vaitaimi.

E faafetai atu foi i le Taitaifono o le Komiti o Tupe Maua ma Tupe Totogi mo lau saunoaga, ae o se faafetai tele i lau Komiti sa fitaituga aua le Lipoti lea ua taoto mai i lumamea nei.

Lau Afioga i le Fofoga Fetalai ua faafogofoga le Maota aemaise Samoa i le saunoaga matagofie a le sui usufono o le Palemene i tulaga taitasi i a latou saunoaga faalauaitetele, e tusa ai foi ma mataupu na laga e uiga i tupe aemaise foi o le tamaoiga ma faiga faavae tau tupe a le tatou Malo, o lea o le a tapena atu ai lenei Itu. Ia, alo maia o le a tali atu le tatou Malo i Afioga i Minisita o fitoitonu i ai mataupu na laga e a outou Afioga, o le a faapena ona tali atu i mataupu eseese e pei ona saunoaina e sui usufono mamalu.

Lau Afioga pe a tusa ai ma lou finagalo, o le a matou amata mai le la Itu i le Afioga ia Toeolesulusulu o le sui usufono mamalu mai Aana Alofi 4, ia ona faasolosolo mai ai lava lea seia oo mai i le matou Itu nei i tali a le tatou Malo.

O le faaaliga lea ma le faaaloalo lau Afioga, ae faatasi mai le Atua i lou alofaiva i lenei taeao aua le faatautaiga o le Fonu faapea foi ou uso ma ou tuafafine vaeatu o outou paia ma outou mamalu, o uso a sui usufono o le

Maota, manuia saunoaga a Minisita o le Kapeneta, manuia le Fonousu, manuia Samoa o lo o faafofoga mai.

FOFOGA FETALAI: Malo faafetai i le saunoaga malamalama a lau Afioga i le Sui Palemia, aemaise foi le faasologa o la tatou galuega, aemaise le tali atu a le taou Malo i mataupu foi sa laga e sui usufono mamalu o le Maota. Malo faafetai o lea ua manino lea tulaga.

Ae na o se faamanatu lava a le Nofoa, o Tali a le Malo po o Tali a se Minisita i mataupu sa fesiligia e sui usufono mamalu, o le tali mulimuli lava lena. E faamanatu faapena, a o le tatou soona fesiligia e se mataupu ua uma ona tali ma ua i ai le faaiuga a le Minisita o le Malo, ia e i ai lona faauigaina o le solifono. O le mea lea, ia, o le uiga lea o le tatou galuega o le tatou galulue faatasi, ina ia maua pea le sologa manuia o le tatou fonotaga. Ae manatu, o lo o i ai lava i le mamalu o le Kapeneta ma le Faigamalo tali uma ma faaiuga uma aua lava le agai i luma i lenei foi vaitaimi o le tatou atunuu.

O le faasilasilaga faamanatu lea a le Fofoga Fetalai ina ia faafaigofie ai le tatou galuega. O le mea lea, ia tulai mai lau Afioga i le Minisita o le Siosiomaga, lau Afioga Toeolesulusulu mo lau saunoaga.

Afioga Hon TOEOLESULUSULU CEDRIC POSE SALESA SCHUSTER (Minisita o Punaoa Faalenatura ma le Siosiomaga): Ou te muai faatulou ma faatalofa i lau Afioga i le Fofoga Fetalai ma le mamalu o le Maota i ona tulaga faalupe.

E faatulou foi ma faatalofa i le mamalu o Samoa o faafogafoga tapuai mai, mai lava i Le Ao o le Malo seia paia se isi ua aupito itiiti ma le taualoa i si o tatou atunuu.

E faatulou ma faatalofa atu foi i le Faigamalo, o tamalii, uso ma tuafafine i le motu i Sasae. E faatalofa atu foi i lou itumalo o Aana Alofi 4.

Lau Afioga i le Fofoga Fetalai, ua faamatalaina i foliga matagofie o lenei taeao le alofa faamatalagata o le tatou Tapaau Sili, le Atua lea na togia e outou tuua ma o matou matua e Faavae ai si o tatou atunuu faatauavaa. Talofa e, seanoa Lona alofa faapalepale i la tatou galuega fai aua Samoa. O le mea mautinoa lau Afioga i le Fofoga Fetalai, o le toga tauese le tofa faafo, a o se lupe e to i le vao le moe mamao i tulatoa ma le aufueta o lenei Palemene. O lenei ua talituaa le fita o le felafolafoaiga i le tofa sausaumamao ma le faautautaga sailimalo. E le o ni tauga a o le ai o seuga, aua le tapuaiga mamalu a le atunuu. Malo le tofa, malo le uta, malo le seusilasila. O laei ia mo le maa, ae le mo le afa, se i tulou.

Lau Afioga i le Fofoga Fetalai, e faasifo le tauvaa ma ou lelepa ma le gatete. Lau Afioga i le Fofoga Fetalai, ne i meaane ua sulaesea le mau a lealailefue, a o taumafai atu e agai le faagalututui o nisi o mataupu sa liaina e sui usufono mamalu o lenei Palemene, se i talatala le laafa e tau faamanino nisi o

atugaluga sa faasau i ai sui usufono mamalu o le Maota, po o le a se faiga a le Malo e fesoasoani ai i mafatiaga o lo o feagai nei ma le atunuu.

Lau Afioga i le Fofoga Fetalai, e tele naua vaega ua faasafua atu i le Tala o le Tupe aua atinae mo tagatanuu o tagata Samoa, e aofia ai avanoa faigaluega ma nisi o pisinisi fou. O ni nai faataitaiga lau Afioga i le Fofoga Fetalai, o tupe faamatuu atu mo itumalo e ala i le \$51 miliona, e talitonu e silia ma le 1,000 avanoa faigaluega o le a mafai ona maua ai i totonu o Komiti ma tagata faigaluega. E silia foi ma le 1,000 ni avanoa ma ni pisinisi fou o lea faapea ona maua mai ai ma ola mai e tusa o nei fesoasoani.

I le atinae tau turisi lau Afioga i le Fofoga Fetalai, o le toe tatalaina o a tatou tuaoi ma le toe faaleleia o atinae tau tagata tafafao, e talitonu o le a silia foi ma se 500 avanoa faigaluega, ae le gata i lea o pisinisi fou o le a faapea ona tulai mai. O le faatauaina o le faiga o faatoaga ma faigafaiva, e tele foi ni atinae ma ni faatoaga o le a faapea ona faaopoopoina i le atiaeina o le tatou atunuu lau Afioga. O se vaega taua lea lau Afioga, a silasila i ai, o le Tala o le Tupe lenei atonu e silia ma le 4,000 ni avanoa faigaluega fou o le a mafai ona maua mai ai i totonu o le tatou atunuu, i totonu o lenei tausaga. E taua foi lau Afioga i le Fofoga Fetalai se tasi o vaega taua e pei ona faatauaina i le tatou Tala o le Tupe lau Afioga i le Fofoga Fetalai, o le tele o seleni ma le tatou Tala o le Tupe, o lo o faasafua atu i atinae i totonu lava o le tatou atunuu. Ma o le tele o nei seleni, o le a mafai ona nofo ma galueaiina i totonu o le tatou atunuu, ma faateleina ai seleni ma tupe maua aua le alu i luma o le tatou Faigamalo.

Tofa Hon Lauofo Fonotoe Nuafesili Pierre Lauofo (Taitai o le Itu Agai): Lau Afioga i le Fofoga Fetalai ou te faafesili atu i le Afioga i le Minisita faamolemole.

FOFOGA FETALAI: Se i tulai mai lau Afioga i le Sui Taitai.

Tofa Hon Lauofo Fonotoe Nuafesili Pierre Lauofo: O le mea e fia malamalama. O lea sa taua le fuainumera lea o le 4,000 galuega fou o le a maua i le Tausaga Faaletupe lenei, a o lea e matau atu o lea e tele ina faaletonu le tulaga o i ai le tamaoaiga i ona vaega eseese, aemaise la le turisi lea foi e i lalo o le vaaiga a lau Afioga. E leai se tupe o maua mai le turisi. O lea la ou te faafesili atu ai po o le a tonu lava le faavae aua o lea e pei e te saunoa i le tulaga lautele, o le a tonu lava la le faavae lea e faavae ai le 4,000 galuega fou lea o le a maua e le atunuu. Ma le faaaloalo.

FOFOGA FETALAI: Ia, faaaau mai le saunoaga a lau Afioga i le Minisita.

Afioga Hon TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai. E pei ona avatu i Komiti o tagata faigaluega o le a mafai ona faafaigaluegaina i totonu o tatou itumalo, ma ua oo i le 160+, e 700+ o le a mafai ona maua mai i Komiti o itumalo i vaega eseese o le a faapea ona faasafua atu seleni e atiae ai itumalo ma faatino ai galuega i totonu o itumalo, o lea foi e maua mai ai nisi o galuega fou o atinae.

O le tulaga pei ona e faafesiligia i tulaga o atinae tau turisi, o le taimi nei, e silia ma le 700 avanoa faigaluega sa faapea ona le o toe maua i le taimi na taofia ai le tatou tuaoi i pisinisi tau turisi. Peitai ane o le tatalaina o tatou border, o le toe gasolo mai o turisi, o le atiaeina o nisi o tatou sites, o itumalo foi ia o le a tuu atu i ai le tapenaina ma le vaaia o nisi o vavau, nisi o tatou sites fou, mataaga. Ou te talitonu o lea vaega o le a tele foi e o le a faapea ona maua ai galuega.

Lau Afioga i le Fofoga Fetalai ona ou see mai lea i le vaega...

Tofa Hon Lauofo Fonotoe Nuafesili Pierre Lauofo: Faafetai atu i lau Afioga i le Minisita i lea vaega...

FOFOGA FETALAI: Se i toe tulai mai lava Lauofo.

Tofa Hon Lauofo Fonotoe Nuafesili Pierre Lauofo: Ia na ona toe faafesili atu lava ma le faaaloalo i le tulaga lea i Komiti Faufautua ia e taua e lau Afioga, o latou ia e galulue mo le Malo e auala atu... O le a le polokalame lea e auala atu ai galuega ia e tofia ai? Po o latou ia o lea e tofi sao atu lava e le Kapeneta mo matafaioi eseese.

Lua o le fesili, o le turisi lea e te saunoa i ai, ia o lea e pei ona ou laga i lau lauga faalauaitele, e fa isi polokalame ia ua aveese, ua leai se tupe, polokalame faalauiloa, faaopoopo atu ai ma isi foi polokalame e lua, ua matua leai lava ma se tupe e ave e faagaioi ai polokalame ia. E pei o le tulaga lea, a o le taua o le mea lea pei ona ou pai i ai, ona o lea e pei ona e saunoa o lea o le a tatala tatou borders. Faafetai i le tofa ua ae i le Malo o le a tatala borders, ona e taua tagata tafafao maimoa mai, o le isi tatou tupe tele lea. E pei ona maua i faamaumauga, ia, pau mai lava i le \$500 miliona lea sa maua i le tausaga, ona o le Koviti-19 le mafuaaga. O lea ua pau lava pau i le leai o se tupe. A o lea foi e i ai le manatu, e le faapea a tatala loa tatou borders ona toe oso loa lea i luga i le \$500 miliona. Ona o mea faapea e faasolosolo malie lava le atiaeina ona e le na o tatou le atunuu lea e tauva i tulaga tau turisi a le Pasefika. Ma le faaaloalo lau Afioga.

FOFOGA FETALAI: Ia, lea ua maua le finagalo o lau Afioga i le Sui Taitai. Ia, faaauau lau saunoaga lau Afioga i le Minisita.

Afioga Hon TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai mo le avanoa. Ia atonu ana lava le onosai a le Sui Taitai o le Itu Agai, e oo atu i ai le folasaga i le auiliiliina o vaega ia, ae taoto mai, e oo atu i ai le faagasologa i le vaega lea e te atugalu i ai lau Afioga i le Sui Taitai. Ae o le faamaninoga o le vaega pei ona saunoa i ai i tatou avanoa faafaigaluega ia, e pei lava ona silafia o lea ua faasalalau e tolu avanoa faigaluega. O totonu o Komiti ia pe tai 10 pe au i le 14 sui a Komiti. O i e i ai latou ia e faagaoiina galuega i tua i itumalo, ae le gata i lea o nisi o galuega e mafai ona faatino aua le faaaogaina o seleni o lo o faamatuu atu. Ae talitonu o le a auiliili atu e nisi o Matagaluega.

Lau Afioga i le Fofoga Fetalai, e ui ina itiiti se vaega o lo o faaalua i le Tala o le Tupe 2022/2023, ae o lo o i ai faapolopolo mai tausaga ua mavae, e pei ona saunoa i ai le Afioga i le Taitaifono o le Komiti o Tupe, i le tele o seleni e le i mafai ona faaaogaina e Matagaluega, ona o le tapunia o tatou borders, o nisi foi o galuega ua faatuai ona o ia avanoa. Ma o le tele o nei seleni o lo o faamatuu ma faagasolo pea galuega e faatinoina ai. O se faataitaiga lau Afioga pei ona saunoa le Afioga i le Taitaifono, e lata i le \$12 miliona le seleni e le i mafai ona faaaogaina e le Pulega o Tagata Tafafao Mai. Ma o ia vaega o lo o faapea ona faatinoina i le Tala o le Tupe i le tausaga nei, faaopopo i ai ma le tupe o lo o faapea ona faamatuu atu.

Lau Afioga i le Fofoga Fetalai, e tusa ai foi o le atinae o tagata tafafao mai Fafo, e silia ma le \$19 miliona se tupe na faaaluina e fesoasoani ai le Malo i le atinae o tagata tafafao mai fafo i totonu lava o le tatou atunuu e aofia ai nisi o polokalame o tatou quarantine, lea sa faanofoesea ai i nisi o faletalimalo le tele o tatou tagata ia na omai a o fai tatou quarantine. Sa fatinoina foi polokalame aoaoga, e silia ma le \$1 miliona e upskill ai tagata faigaluega i atinae o tagata tafafao, ona ua leai ni galuega, ua le mafai ona faaoga e latou faletalimalo. E i ai foi polokalame sa faatinoina e fesoasoani ai i totogi o tagata faigaluega i nei lava atinae.

FOFOGA FETALAI: Ua ou vaelupeina le saunoaga a lau Afioga i le Minisita, e talitonu foi o lea ua oo i le tatou taimi o le tatou malologa masani o le taeao, ae toe fotuai le saunoaga tatou te taliu mai ona toe faaauau lea. E i ai lava nai itu ia sa fesili atu ai le Taitai o le Itu Agai, ia o lena ua e silafia. Malo lava, o lea foi e avatu a o lena ua manaia foi lau saunoaga. Saunoa sao mai pea i le Nofoa ona ou faasoasoina lea o fesili a le vaega lea e i le itu lea. O le a faataatiaese Galuega a le Fono Aoa mo lana malologa o le taeao.

Na faataatiaese Taulumaga a le Fono Aoa Faitulafono mo lana malologa masani i le itula e 10:45 i le taeao ma toe faaauau i le itula e 11:23 i le taeao.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofa Fitolafono.

Ou te manatu foi ua matu i fau le taligasua a le tatou Maota. E talitonu foi ua maua se faasiligamalosia o le paia o le Palemene e faaauau ai le tatou galuega. Malo le onosai.

Ou te tapa ma le faaaloalo lau Afioga i le Sui Palemia mo le lafo.

LAFO MO LE FAAUUAUINA O ITULA FONO

Afioga Hon TUALA TEVAGA IOSEFO PONIFASIO: Lau Afioga i le Sui Fofoga Fetalai, ou te manatu o lea ua maea paleauau le taliga o le sua i le Maota nei, faamalo faafetai i lau Afioga, aemaise foi o le tatou Ofisa mo le taumafataga o lena taeao. O lo o amanaia pea le lelei faagasolo o le tatou galuega, ma e i ai foi le manatu o le a vave maea tatou taulumaga pe a sosolo ai lava le tulaga lelei o lo o i ai nei.

Ou te tulai atu ma le faaaloalo lau Afioga e faatu le lafo, *Ina ia faataatiaese Tulafono Tumau 32 o le sua o a tatou itula Fono mo le Aso Fono lena e faapea, O le a faaauau pea tatou Taulumaga seia aulia le itula e 1:00 i le aoauli nei ona faataatiaese lea ma tatou toe tauaofia i le itula e 6:00 i le afiafi ma faaauau seia tolopo i le itula e 10:00 i le po a nanei.*

Faaluaina e le Minisita mo Faatoaga ma Faiga Faiva.

Na faamaonia le lafo.

FOFOGA FETALAI: E faataatiaese tatou galuega mo le malologa i le taeao o lo o saunoa le Afioga i le Minisita o Punaoa Faalenatura ma le Siosiomaga e talifuaitau foi i mataupu sa laga e sui usufono mamalu. O le mea lea, ou te tapa ma le faaaloalo lau Afioga i le Minisita e te tulai mai e faaauau lau saunoaga.

Afioga Hon TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai mo le avanoa e toe faaauau ai se faamatalaga. E piiama foi i le saunoaga a le Afioga i le Sui Palemia e momoli atu ai le agaga faafetai i lau Afioga ma le Matagaluega aua se faasiligamalosia o sui usufono mamalu o le Maota Fono aemaise alii ma tamaitai o Ofisa Sili o Pulega o Matagaluega o lo o faapea ona tautuaina le tatou Fonotaga.

Lau Afioga i le Fofoga Fetalai, o le a toe faailo se vaega e pei ona i ai nisi o manatu i le tulaga lea i se fesoasoani mo atinae tau turisi po o tagata tafafao mai fafo. E pei ona faailo lau Afioga i le Fofoga Fetalai, tusa ma le \$19 miliona sa faaalu i le tausaga ua tuanai e fesoasoani ai lea mo tatou atinae o

tagata tafafao mai fafo, e ui e le i i ai ni tatou turisi po o tagata tafafao mai ona o le tapunia o tatou borders.

I le oo mai la i lenei Tala o le Tupe lau Afioga pei ona faailo i totonu o le tatou Tala o le Tupe, le \$9 miliona lea e taua faapea ua pau. Peitai ane lau Afioga, pei foi ona faailo e le Afioga i le Taitaifono o le Komiti o Tupe, o lo o i ai le \$11 miliona mai le Tala o le Tupe i le tausaga ua tuanai, e le i mafai ona faatinoina ona o nisi o le taofiga o tatou borders.

Lau Afioga e faaopoopo foi i ai i totonu o le Tala o le Tupe i lenei tausaga e pei ona faailo e le Afioga i le Taitaifono le \$3 miliona lea ua faamatuu atu i le Samoa Business Hub, o le avanoa lea e mafai ona talosaga ai pisinisi laiti, aemaise lava foi nisi o tatou atinae tau turisi e fesoasoani ai i le toe amatalia ma le toe tapenaina o latou mataaga ma latou pisinisi, o beach fales ma vaega faapea i le toe tatalaina lea o tatou borders.

E faapea foi le fesoasoani e \$5 miliona lea ua taoto atu i le DBS ina ia mafai ona autovaa atu foi a tatou pisinisi e lavea ai ma tatou pisinisi tau turisi e mafai ona fesoasoani ai i le toe tapenaina o a latou galuega, aemaise o le tatalaina lea o latou faletalimalo, o atinae ma vaega faaopoopo.

Lau Afioga i le Fofoga Fetalai, e faaopoopo i ai i lea vaega, ua maea nei ona sainia i le va o le tatou Malo ma le Malo o Niu Sila lana fesoasoani faaauau e tusa lea ma le NZ\$4.6 miliona mo le isi tolu tausaga, e patino lava i atinae ma le faaleleia o le tamaoaiga o tagata tafafao mai fafo. Ia o lea la ae faaopoopo i ai i lea vaega, tusa e \$1.3 miliona mai le maliega i le tausaga ua tuanai, e le i mafai foi ona faaaogaina uma ona o le tapunia o tatou borders. Lau Afioga ona faaopoopo lea i ai o le tatou atinae...

Afioga Lupematasila Galumalemana Tologata Togia Tile Leia: Lau Afioga i le Fofoga Fetalai...

FOFOGA FETALAI: Se i tulai mai le sui usufono o Falelatai ma Samatau po o le a se mataupu o...

Afioga Lupematasila Galumalemana Tologata Togia Tile Leia: Faafetai i lau Afioga i le Fofoga Fetalai mo le avanoa. E leai se manatu e faalavelave i le saunoaga matagofie a le Afioga i le Minisita. Ae leaga o lea e saunoa le Afioga i le Minisita i le \$11 miliona ma le tele o isi tupe ia e le i mafai ona faaaoga i le tausaga faaletupe 2021/2022. A o le fesili e fia fesili atu i le Afioga i le Minisita, pe aisea ua le aumaia ai tupe na i le tatou Tala o le Tupe lea e faagasolo nei pei o tulaga masani. Ma le faaaloalo.

FOFOGA FETALAI: Ia, saunoa mai lau Afioga i le Minisita.

Afioga Hon TOEOLESULUSULU CEDRIC POSE SALESA SCHUSTER: Faafetai lau Afioga i le Fofoga Fetalai. E fia tali atu lava ae

leaga e le i saunoa i ai le sui usufono lea i lana saunoaga lautele, ae o le a ou taumafai pea lau Afioga e alu atu pea se ata...

Afioga Lupematasila Galumalemana Tologata Togia Tile Leia: Lau Afioga i le Fofoga Fetalai...

FOFOGA FETALAI: Pei o lea foi ou te tilotilo atu ea i i pei lava e le i aafia i au saunoaga, e leai lava ma se mea...

Afioga Lupematasila Galumalemana Tologata Togia Tile Leia: O au e tumu i le faaaloalo, ae atonu ai e sese le matau a le Afioga i le Minisita, a o le mataupu tonu lava lea sa ou lauga ai o le pau o le paketi a le Ofisa o le Turisi.

FOFOGA FETALAI: Saunoa lau Afioga i le Minisita.

Afioga Hon TOEOLESULUSULU CEDRIC POSE SALESA SCHUSTER: Faafetai lau Afioga i le Fofoga Fetalai. E pei ona avatu se vaivaiga, o le a ou taumafai e faailoa atu le tulaga lea e pei ona taua. O lea ua uma ona faamanino foi e le Afioga i le Taitaifono o le Komiti o Tupe vaega ia ua ala ai ona i ai vaega e le mafai ona faaaogaina. E talitonu foi o le tele o alii ma tamaitai o le tatou Palemene nei, o e sa Minisita ma e o lo o seei foi i le tofiga o le Minisita, e malamalama lelei i le vaega lea. Atonu foi e silafia foi e le Afioga i le sui usufono aua sa ia vaaia foi le Matagaluega a le EPC, ia o le tele o nisi o tupe totoe ona o galuega e le mafai ona faatino, ia o lea o lo o faasee mai e faaauauina ai galuega ina ia mafai ona faamaeaina i lea tausaga ae ese mai ai i le Tala o le Tupe Faatatau lava o le tausaga lenei. E pei ona fesoasoani atu...

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai...

FOFOGA FETALAI: Ia se i tulai mai lau Afioga i le Sui Taitai.

Tofa Hon Lauofo Fonotoe Nuafesili Pierre Lauofo: O le fesili fia malamalama ai i le tulaga lea, ona e pei e te i foi i le faalogo le faiga lea e saunoa i ai le Afioga i le Minisita. Ia manatua foi o Tala Faatatau Autu o Tupe o le Tausaga Faaletupe lea na tuanai nei, o le Tulafono, e aumai faapili i totonu o le Maota, ona pasia lea o le Tulafono Appropriation Act e faatulafonoina ai le faaaogaina o tupe. A maea la le tausaga pe le i maea foi, e mafai foi la ona toe fetuunai i lalo o mea o Supplementary po o Tala Faaopoopo. Ae tele foi isi Matagaluega o la e le o lava a latou seleni, o la e manaomia e latou le seleni, ona faaoga lea o le tatou Supplementary e

faasafua atu ai i isi Matagaluega o la e manaomia, ae le i oo i le isi Tala Faatatau Autu o Tupe e faatulafonoina ai. O lea la ua tatou sauni, o lea ua aumai le pili lea, a tatou pasia loa le mataupu lenei ona avea lea ma Tulafono. Afai la e le o aumaia i i tupe na, o lona uiga ua le faatulafonoina le faaaogaina i le tausaga faaletupe lea o le a lumanai nei.

O le mafuaaga lena o le fesili, aua o tupe la ia e pei e foliga mai e le i maea ona faaaoga ona o le Koviti-19 ma a isi mafuaaga, ae tatau ona aumai, aua a faaiu le tausaga faaletupe, ona toe foi uma lava lea o tupe ua uma le Tulafono, toe foi uma lava lea o tupe i totonu o le Ofisa o le Tupe e toe faatulaga mai lalo o le pili. O lea la ua aumai le Appropriation Act lea.

FOFOGA FETALAI: Ia o lea ua maua lou finagalo.

Tofa Hon Lauofo Fonotoe Nuafesili Pierre Lauofo: E pei o le tulaga lea e fia malamalama ai lau Afioga i le Fofoga Fetalai...

FOFOGA FETALAI: O lea ua maua lou finagalo...

Tofa Hon Lauofo Fonotoe Nuafesili Pierre Lauofo: E aiga lava ma le fesili lea na fesili ai le sui usufono lea faatoa uma atu nei.

FOFOGA FETALAI: Ia, e talitonu o lea e tau matau atu lava e le Nofoa, atonu o lea ua lagaia le finagalo o le Sui Taitai ona o le lauga a le Minisita. E i ai foi le manatu, e leai o lea lava ua tali manino le Minisita ia i le tulaga o mea na laga i le taimi o saunoaga. O le mea lea, lau Afioga i le Minisita, faaauau lau saunoaga.

Afioga Sulamanaia Fetaiai Tauiliili Tuivasa (Vaimauga 1): Lau Afioga i le Fofoga Fetalai, mo le fia faasaoina o le taimi o le Minisita. Ou te tulai ma le agaga faaaloalo ona e fia malamalama foi le sui usufono lenei e fou foi i le faalogo le tulaga lea o le roll over, a o lea tatou te....

FOFOGA FETALAI: Sa e lauga ai?

Afioga Sulamanaia Fetaiai Tauiliili Tuivasa: I, sa ou lauga ai. A o lea tatou te matau uma lava, pei ona tau... a faapea o le tou faiga faavae lena...

FOFOGA FETALAI: Ia, ou te faamalulu atu i le sui usufono, malie le finagalo o le sui usufono, o lea ua oo mai i luga nei ia te au e te le i saunoa i ai. Faapuupu ma faafaigofie ai le tatou mataupu. O le a tauau foi ina lagalaga foi mea tou te le i saunoa iai.

O le mea lea, saunoa lau Afioga i le Minisita.

Afioga Hon TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai...

Tofa Hon Lauofo Fonotoe Nuafesili Pierre Lauofo: Ia e tofa malie lau Afioga i le Fofoga Fetalai, o le mataupu lea sa ou lauga ai. Ma le faaaloalo. E pei o isi mataupu uma i le tulaga lautele.

FOFOGA FETALAI: Saunoa lau Afioga i le Minisita.

Afioga Hon TOEOLESULUSULU CEDRIC POSE SALESA SCHUSTER: Lau Afioga i le Fofoga Fetalai, ia o le a taoto atu le mataupu lea i le Afioga i le Minisita o Tupe e faalauaitele le vaega lea, ae faagasolo lau folasaga. E tusa ma le... e pei ona faailoa e tusa ma le \$9 miliona tala Samoa e tusa o le fesoasoani a le Malo o Niu Sila o le a mafai ona faataoto atu e fesoasoani foi i le atinae i totonu o le tolu tausaga, e fesoasoani i a tatou atinae tau turisi.

E talitonu foi tasi lea vaega taua o le seleni ua faamatuu atu i itumalo, e pei ona i ai foi le naunautaiga e tapena ai atinae o itumalo. Ia atonu e i ai ni itumalo o le a fai ni latou faletalimalo ia po o nisi foi o mataaga ia ma faapea ona faaopoopoina foi ia seleni i seleni o lo o faapea ona mafai ona faaaluina i le tatou atinae o tagata tafafao.

Lau Afioga i le Fofoga Fetalai ona faapea lea o se faamatalaga, e silia ma le \$20 miliona i le \$30 miliona se tupe aofaiga atoa o le a faapea ona mafai ona faaogaina aua atinae tau tagata tafafao mai fafo.

Ona see mai ai lea lau Afioga i nisi o fesili foi ma atugaluga o le tatou Maota nei, po o le a le alu i luma o le tatou atinae. E tele lava fuafuaga a le Pulega o tatou tagata tafafao e le gata ina faalautele tagata tafafao mai, a o polokalame foi e faalauiloa ai, e galulue faatasi ai ma nisi foi o alo ma fanau a Samoa o lo o i fafo tautaua e mafai ona latou galulue e faalauiloa Samoa. E pei foi ona saunoa le Afioga i le Taitaifono o le Komiti o Tupe, ia o lo o galulue foi le Pulega ma nisi o tatou autaaalo e faapei o tatou aulakapi, e le gata i lea o autaaalo foi o lo o auai atu i Mini Games ma Commonwealth Games ma nei vaega uma ua taumafai le Pulega e galulue faatasi e faaoga lo latou avanoa leni e faalauiloa atu ai si o tatou atunuu i atunuu i fafo.

O le faanaunautaiga foi lau Afioga a le Pulega ma leni Sector, o le galulue ma le Matagaluega o le MWTI ina ia mafai ona faateleina ni flights i le sau i totonu o Samoa, ma avanoa e mafai ona faasalalau ai tatou avanoa e omai ai, e le gata i le tele o ni airlines, a o le tele o ni avanoa e mafai ona maua e omai ai ni tagata mai fafo lau Afioga.

Lau Afioga i le Fofoga Fetalai ona ou see mai lea i le Matagaluega o Punaoa Faalenatura ma le Siosiomaga. O le a amata atu se vaivaiga lau Afioga i le mataupu sa laga tau eleele, e le gata o le Tulafono o le LTRA, a o nisi foi o

talosaga na faaooina mai mo fanua faale-Malo ua i lalo nei o le Malo i ni avanoa e faamatuu atu ai mo atinae a itumalo ma afioaga.

Lau Afioga i le Fofoga Fetalai, ia, ina ne i te i ua mau eseese Tutuila ma Ape i le Tulafono o le LTRA, po o i ai foi le Tulafono foi lea a tatou o le Customary Land Lease Act, o le LTRA lava ia, e patino i le lisiina lea o freehold land e le lavea ai tatou Customary Land, a o le resitala, o le tatou Tulafono lea o le Leasing and Licensing of Customary Lands Act 1965, lea na toe iloilo ma toe lauliliu i le tausaga po o le 2018, lea o lo o faamanino mai ai i i auala foi ia pei ona faatinoina i le taimi lenei, o le lisiina lea o fanua faaleaganuu i pisinisi ma tagata foi e fia lisiina. E talitonu o le tele lava lea o lo o faaaogaina nei i le lisiina o pou foi nei a le Digicel, o le lisiina o fanua e fai ai pamuvai a le SWA, ia ma nisi o tatou kamupani o lo o faapea ona faaaogaina fanua tau Samoa i le taimi nei, e aofia ai foi ma nisi o fanua o lo o faapea ona lisiina e faatinoina ai atinae tau faletalimalo. A o le LTRA, e pei e patino lava lea Tulafono mo Freehold lau Afioga, o le resitalaina lea.

O le talitonuga foi lau Afioga, sa maua i le saunoaga foi a se tasi o sui usufono le vaega lea o le sainia e le Minisita o lisi, e patino tonu le vaega lea i lalo o le tatou Leasing and Licensing of Customary Lands Act. O le taimi nei, o le faataatiaga o lo o i ai a le Matagaluega e faatalanoa ma seiloga ua maea uma ona faamatuu atu pepa e iloa e ala atu i le Faamasinoga o Fanua ma Suafa le faamautuina o e ona ia fanua, e ala lea i le faasalalauina o se lisi. A maea lea ona iloilo lea ma faatalanoa seiloga ua i ai se maliega a e ona sulii po o e ua i ai le faatulagaina o ia fanua ona faatoa mafai lea ona faatino le lisi.

Ia ma o le tulaga foi lea lau Afioga, o le Minisita na ona act as Trustee, o le puipuiga o le tatou atunuu lau Afioga e i ai le vaega lea, a o le pule o le fanua, e le i lalo o le Minisita po o le Malo, o lo o taoto pea lava i lalo o e ona le fanua. O se taumafai lea e faapulapula atu lea vaega lau Afioga i le Fofoga Fetalai...

Tofa Ale Vena Ale (Faleata 4): Lau Afioga i le Fofoga Fetalai pe maua se avanoa...

FOFOGA FETALAI: Malie le Afioga i le Minisita se i tuu atu le avanoa i le Igoamatua ia Ale, leaga o lea sa laga...

Tofa Ale Vena Ale: Faafetai i lau Afioga i le Minisita, faafetai foi mo le saunoaga malamalama a lau Afioga i le Tulafono lea sa ou... o lea foi ua manino o lea ua i lalo o le licensing and leasing i lalo o... a o le mea lava lea ou te tetee ai, o le faiga lea o le lisi lea, e totogi atu i le Matagaluega. E moni lava o lea ua... i le Minisita, a o le totogi atu lea o tupe i le Matagaluega, ae tataua lava ona fai sao pea le lisi ia i le va o le... e pei o le itu lena po o le a le saunoaga a lau Afioga. Faafetai.

FOFOGA FETALAI: Malo faafetai. Ia, lau Afioga i le Minisita.

Afioga Hon TOEOLESULUSULU CEDRIC POSE SALESA SCHUSTER: Faafetai i le Afioga i le Fofoga Fetalai. Faafetai mo le faafesili, atonu o le tulaga foi lea na i ai i le Tulafono, o le taumafai lava o le tatou Malo ia i ai se pui-puiga mo land owners. E pei la e i ai foi tulaga a fai lava le agreement ma saina ave sao le tupe, a oo la ina le totogia le lisi a le tagata lea, ia ua leai se refuse a le aiga. E pei o le vaega lea o lo o taumafai, atonu o le vaega lea na ala ai ona i ai se vaega lea e alu i totonu o le Malo, ma e fesoasoani foi le Matagaluega e tulituli i latou e le o totogia lisi. Ae o lo o i ai i totonu o le Tulafono le avanoa e mafai ona agai ai lava e o lo o ona fanua e toe tulituli foi. Ae tusa ai o le saunoaga, o le a taumafai foi e toe silasila i ai le Matagaluega po o le a se auala e mafai ona faafaigofie ai ae le gata foi i lea ina ia mafai ona... e pei ona saunoa le sui usufono o Faleata 4 i le tulaga lea o le ave sao i totonu o accounts a Lease Agreement lea. Ae pei o le aua lava lea o le faamoemoe ina ia mafai ona pui-pui tatou land owners lau Afioga.

FOFOGA FETALAI: Ia, faaauau le saunoaga a lau Afioga, o lea ua malamalama foi le sui usufono mamalu.

Afioga Hon TOEOLESULUSULU CEDRIC POSE SALESA SCHUSTER: Faafetai lau Afioga i le Fofoga Fetalai. Ia, ona see mai loa i nisi o sui usufono foi o le Maota nei sa faapea ona faatalosagaina nisi o fanua o le Malo e atiae, e le gata o afioaga ma ala-alafaga, a o galuega fai foi aua atinae a tatou itumalo. Faafetai o lea ua maua e le Matagaluega nisi o talosaga ua faaoo atu, a o nisi na faaleo i le Maota, o le tuualalo lau Afioga i le Fofoga Fetalai. E lelei lava le faaleo i i ona tapena lelei lea o le tusi ma faaoo atu i le Matagaluega e mafai foi ona tuu ai i totonu ma fai ai le ilo-iloga ma faatino le suesuega aua le manaoga o lo o faapea ona faailo mai totonu o le tatou Maota. Ae i nisi o afioaga foi ma itumalo ua maea ona faaoo mai a latou tusi ma talosaga, o lea o lo o faagasolo ai nei le polokalame a le tatou Pulega o le tatou Land Board.

Lau Afioga i le Fofoga Fetalai, ona ou see mai loa lea i le vaega lea sa...

Afioga Hon Tapunuu Niko Lee Hang (Vaimauga 3): Lau Afioga i le Fofoga Fetalai...

FOFOGA FETALAI: Ia, malie lau Afioga i le Minisita se i tuu atu i le Afioga i le sui usufono mamalu mo Vaimauga 3.

Afioga Hon Tapunuu Niko Lee Hang: Ia faafetai atu i lau Afioga mo le avanoa. Faafetai o lea ua tali mai le Afioga i le Minisita leaga sa ou tuualalo

foi i le Afioga i le Minisita ona o le matou itumalo o Vaimauga 3 e leai ni fanua. Pei o le tele lava o afioaga e tu taulaga ma e lata i le taulaga. A o lea la ua saunoa manino mai le Afioga i le Minisita, ia o le a avatu le tusi. E lelei la oe e te tali mai, a o Olo e le tali mai i matou tusi. Faafetai.

FOFOGA FETALAI: Ia, faaauau le saunoaga a lau Afioga i le Minisita.

Afioga Hon TOEOLESULUSULU CEDRIC POSE SALESA SCHUSTER: Faafetai lau Afioga i le Fofoga Fetalai. Ia, ona ou see mai lea i le vaega lea o le malosi faafouina po o le renewable energy ma sustainable energy, ona na taua foi e nisi o sui usufono polokalame foi po o fuafuaga a le tatou Malo o le a taoto atu i le Afioga i le Minisita o lo o feagai ma le EPC tapenaga. Peitai ane lau Afioga i le Fofoga Fetalai, ia na ona faailo pea, o lo o i ai lava fuafuaga o lo o galulue faatasi i ai le Matagaluega o le Siosiomaga ma le Punaoa, le Matagaluega o Galuega Tetele ma le Matagaluega o Tupe, e tapena se auala ina ia mafai e le gata ina ia faatele le tatou renewable energy, ae mafai foi ona convert le tele o tatou vaega o lo o alu ai le tele o le penisini e pei o tatou taavale, o vaega o lo o malosi ai le alu o le eletise. O vaega uma ia e taumafai i ai ina ia mafai ona faaitiitia. O lo o tapena foi le policy ina ia toe iloilo ia mafai ona tatou see atu i le tulaga lea o le tele o le tatou renewable energy ma faaitiitia tupe alu i le tau o le tatou eletise ma vaega o le malosi faafouina o lo o taugata.

Lau Afioga i le Fofoga Fetalai, ona ou see mai lea i le vaega lea o nisi o polokalame faatino a le Matagaluega lau Afioga. E pei ona silafia o lo o faagasoloina nei le polokalame foi o le toe totoina o le vaomatua. O le faanaunautai ina ia galulue faatasi le Matagaluega ma tatou afioaga ma itumalo uma ina ia toe totoina le vaomatua e le gata o laau Samoa, a o laau foi e taua mo faatoaga. Ae le gata i lea, o laau e aoga mo le puipuia o le tafiese o tatou gataifale, aemaise foi o alavai o lo o faatinoina ai lenei polokalame a le Matagaluega, ma e fuafua ina ia mafai ona faasafua uma ma galulue uma ma afioaga o le tatou atunuu.

Lau Afioga ona ou see mai lea i le vaega lea o le tatou fesuaiga o le tau pei foi ona faalia e le gata i nisi o sui usufono, ae o lau afioaga i le Fofoga Fetalai, tasi lenei o vaega taua i le tatou Foreign Policy, o le faailoa lea o aafiaga o le tatou atunuu ia ma saili foi auala e mafai ona tapena ai le tatou atunuu e tali atu ma faaitiitia aafiaga o le fesuaiga o le tau. E le gata foi i lea, o le auala e mafai ona faafaigofie ai i o tatou tagata ona nonofo ma lenei vaega o le tatou adaptation and mitigation measures. E tele lava vaega o lo o faapea ona faatalatalanoaina ma tapena ina ia mafai ona maua mai ai foi fesoasoani aua se lumanai ma le tatou tali atu i nei vaega ma fesuaiga o le tau lau Afioga.

Ona maea ai lea lau Afioga o se folasaga e tusa ai foi ma faafesili a sui usufono mamalu o le tatou Palemene nei.

E faaiu atu ai se faamatalaga i si ou itumalo o Aana Alofi 4. Faafetai tapuai. Ou te talitonu o lea ua amatalia le tatou polokalame lea o le tatou itumalo, o lea ua maea ona amata le tatou Komiti ma ua faataoto foi le tatou polokalame. E talitonu o le maea ai o le fonotaga a le Palemene i lenei vaiaso, vaiaso fou tatou feiloai e faasavali i afioaga taitasi o le tatou itumalo e faalauiloa ma maua foi se avanoa e aumai ai le tofa ma le faautaga aua lava le fuafuaina o tatou atinae ia maua se lumanai manuia o le afioaga, itumalo aemaise le tatou atunuu.

Lau Afioga i le Fofoga Fetalai, ona maea ai lea o se tala. E avatu le agaga faafetai i alii ma tamaitai Ofisa Sili o Pulega o Matagaluega a le Malo o lo o vae ma lima i ai le tautuaina o le tatou atunuu. Faafetai foi i Afioga i alii ma tamaitai sui usufono sa faapea ona afea lenei Matagaluega, ona o le naunautaiga lava ina ia maua se lelei mo si o tatou atunuu. E faamalie atu pe afai ua le faamalieina lau faalogologo i le tali i nisi o taumafaiga, a o le naunautaiga o le tatou galulue faatasi. A i ai foi se vaega, o lo o avanoa lava le Ofisa o au tatou te feiloai ma faasoa ai. O le a foi se vaega e mafai ona tautua ai, ia, o le naunautaiga lena o lou nei tagata aemaise le tatou faigamalo.

Faafetai i lau Afioga i le Fofoga Fetalai i le faatautaiga o le tatou Fono. Manuia Samoa.

FOFOGA FETALAI: Ua faamalo saunoa i lau Afioga i le Minisita o Punaoa Faanatura ma le Siosiomaga aemaise foi Turisi. Ia e talitonu lava o lea ua e tapui lava ma e saunoa foi i tulaga faavae a le Malo aemaise foi o fuafuaga alualumamao a le Kapeneta. Ia, ou te talitonu o lea ua faamalieina ai foi sui usufono mamalu. Malo lava le tofa, faafetai foi i le tali mai i mataupu foi sa laga e sui usufono mamalu o le Palemene. Malo lava le onosai, faafetai foi lagolago mai i le Nofoa. Aua e pei lava ona silafia, leai o tatou Tulafono Tumau lava, na o mea lava sa e laga i au saunoaga. O lea lava ou te nofonofa ma au mea uma lava sa outou saunoa i ai, e manino lenei le Nofoa e faapuupuu ai foi le tatou taimi ma le tulaga o tatou felafolafoaiga ina ia faafaigofie.

O le mea lea, lau Afioga i le Minisita o Fesootaiga aemaise foi le Maota Fono o Samoa. Lau Afioga.

Afioga Hon TOELUPE POUMULINUKU ONESEMO (Minisita mo Fesootaiga ma Faamatalaga Tekonolosi): E momoli atu le agaga faafetai o lenei itumalo ma le usugafono i lenei taeao i lau Afioga i le Fofoga Fetalai mo le avanoa ua tuuina mai e fai ai se sao o lenei itumalo i le Tala Faatatau Autu o le Tupe 2022/2023, aemaise foi o le Tala Faaopoopo o le Tupe 2021/2022.

Lau Afioga i le Fofoga Fetalai, o le upu faamanatu i le Aso Sa ananafi e tusa ai o le Tusi Faitau Aso a le EFKS, faatinoina o tiute. O lona uiga,

faatinoina o tiute tauave. E fialia ai i lenei taeao e lototele i le timaiga ma le fesoasoani faaleagaga sa tatou maua i le aso ananafi. Faatinoina tiute tauave e tusa o le finagalo o le Atua.

E muai faatulou ma faatalofa lenei itumalo i le paia o le Palemene i lenei taeao i le afio o lau Afioga i le Fofoga Fetalai ma sui usufono mamalu o le Palemene o Samoa. Ae a le afio o le Afioga i le Failautusi o le Fono ma le mamalu o le aufaigaluega.

Susu le Afioga i le Sui Palemia, o le paia lava lea aua le Afioga i le Palemia. Afifio Minisita o le Kapeneta ma Minisita Lagolago. Ae a le paia o Ofisa Sili o Pulega o Matagaluega o lo o tatou mafuta i lenei taeao, le paia lava aua le Malo. Ae a le faafogafoga tapuai a le Afioga i le Faamasino Sili ma le Peresetene o le Faamasinoga, alii ma tamaitai Faamasino, ae a le Afioga i le Resitara ma le mamalu o le Ofisa o Faamasinoga.

O le paia o le Tafatolu Fefaatauagai o le Malo o Samoa, ae a le paia o Samoa i lona aotelega. Le afio o lau Afioga i Le Ao Mamalu o Samoa ma lau Masiofo. Le afio o le Sui o le Fono o Sui Tofia ma lou faletua. Afifio Tama Aiga, afifio Aiga o Tupu, Aiga o Papa, Aiga o Nofo. Ae a le Nofoa Pule o Tumua, Aiga i le Tai ma le Vaa o Fonoti. E faatulou i le tapuaiga a le Aiga Sa Levi, Faauluuluga o Ekalesia e fia o lo o nonomanu aua Samoa. Le paia i toeiina ma Laulau-a-Fono a Ekalesia ma outou faletua, tulou.

E le faagaloina le motu i Sasae, le Faigamalo a Tutuila ma Manua. I le afio a lau Afioga i le Kovana ma lau Kapeneta, afio le Peresetene ma le Maota o le Senate, ae a le Afioga i le Fofoga Fetalai ma le Maota o Sui. O le paia lava lea aua le Faleagafulu, Sua ma le Vaifanua, Ituau ma Alataua, Fofu ma Aitulagi, Saole ma le Launiu Saelua. O le paia i le Faleagafulu, ae a le tapuaiga a le Motusa, le afio o le Laau na Amotasi, afio Faatuiotomoti, ma le Tootoo o le Faleula, upu i le Manuatele. Ae a le aufaigaluega tofofi a le Atua o lo o tapuaia faiva o le Faigamalo a Tutuila ma Manua. O paia na o Samoa o lo o tau i ma apelepele i le malae i Tiafau, tulou.

Afio lau Afioga i le Fofoga Fetalai, e fialia e faafeiloai i si ou itumalo o lo o nofo tapuai. I le afio o Lalogafa ma la lua Nofo, ae a Tauagaeseese ia Falealili. Susu lau Susuga i le toeaina, le Sui Taitaifono o le Ekalesia, le paia lea aua le Aiga Sa Levi, o lo o tatalo i le ao ma le po aua lo tatou itumalo. Ae a le pule na lua i saoa ma tamaitai, faletua ma tausii ma le malosii o lo tatou itumalo, malo tapuai, faafetai tatalo.

Lau Afioga i le Fofoga Fetalai, e taumafai atu se sao o lenei Matagaluega, e le gata i le Ofisa o le Fono, le Failautusi faapea le Matagaluega o Fesootaiga, Faamatalaga ma Tekonolosi, Pule Faatonu aemaise auaunaga faafale-Meli.

E fialia lava i lenei taeao e tulai ai e momoli se tofa, tupu ma tamalii o lo o fita i tuga i lea auaunaga. E faafetai faapitoa i le Minisita o Tupe ae lei faia se leo, e le faigofie nei aso. O le Tala o le Tupe atoa lenei o lenei Nofoaiga. Ma e manatua ai lava le tatalo faamanatu a le Faaola, “e foai taumafai e tatau

ma le aso.” Lau Afioga i le Fofoga Fetalai, o taumafa o manaoga. O manaoga o lenei vaiata, i le lului o faamai ma le tele o tulaga e pei ona silafia le pau o le tamaoiga, ia tatou silasila i mea e tatau, manaoga. E tatau ma le aso, lau Afioga i le Fofoga Fetalai, o le taimi o le Atua, tatou te faasoasoatau, e tali o tatou manaoga lelei, e tusa ma taimi o le Atua.

Lau Afioga i le Fofoga Fetalai, i le tulai mai o le Faigamalo, o le tele ia o tulaga lelei, peitai o lo o i ai faatasi ma le tulaga e ao ona faaleleia, aemaise lava lau Afioga i le Fofoga Fetalai i le tulaga tau seleni. E tele seleni sa faatino ai atinae, aemaise lava i tulaga tau fesootaiga. O la matou vaai i le Faigamalo ma lona tulai mai, e ao ona toe faatulaga faataoto i se lelei mo le agai i luma. O le ala lea sa tapenaina ai Faiga Faavae e limataitaina ai galuega faatino a lenei Matagaluega, aemaise lona Industry mo le agai i luma. Sa fautuaina e le Kapeneta, ina ia toe silasila le Matagaluega o Fesootaiga, e le gata ia lelei le access, aemaise lava i aoga ae ia fesoasoani ma faamama avega i lo tatou atunuu.

Lau Afioga ua maea pasia e le Kapeneta ma o lo o faagasolo galuega talafeagai i le tulaga o lana IXP. O lea galuega o le internet exchange point. E pei lava silafia, o le taimi nei a e fesootai i le Facebook, e te agai i o i Amerika e toe agai mai ai, e talanoa lea i lou uso sui usufono, afioga i le Minisita o le Siosiomaga. O le mamao lena o le taamilosaga a le internet, pe a faaalu i le mea lea e i ai i le taimi nei. O lona uiga o le traffic lea e te afio i Amerika ma toe afio mai, e totogi uma lava lau Afioga. Aepeitai o le IXP lenei ua uma ona pasia e le Kapeneta, ina ia faataugofie ma faafaigofie le connectivity aemaise lava i aoga. O le ala lea lau Afioga, o le tasi lena o Faiga Faavae muamua, taumafai i ai le Faigamalo, ma tali i ai i manaoga, e le gata i le tatou Iunivesite aemaise o le Matagaluega o Aoga, ina ia faafaigofie ma taugofie.

Lau Afioga i le Fofoga Fetalai e le faigofie lea tulaga o le IXP, ona e tatau ona i ai le maliaga autasi a tatou Kamupani telefoni, e mafai ai ona fesootai i totonu i nei, ae le agai atu i fafo. E faafetai ai ia tatou Kamupani i o latou Faaululuga mo le faamoemoe ua talia le faatofalaiga a le Kapeneta e faatino lea tulaga.

Lau Afioga i le Fofoga Fetalai, e pei ona ou taua le taua o le tulaga o le tatou School Connectivity, i le faalogologo totoa i le saunoaga a le sui usufono o le Maota, ua ese lenei Fonotaga, ua tau leai se isi e toe lauga i le School Connectivity, e masalo ai ona.....na o fesili atu i le Minisita o Aoga po o le a le mea ua tupu ua le toe lauga se isi i le School Connectivity, ae faafetai atonu ai ua tali se manaoga o lenei Matagaluega, e pei ona galulue soosoo tauau ai ma le Matagaluega o Aoga. E pei ona silafia o lo o ua faagasolo nei le faapipiina o a tatou Satelite i aoga e 120. O le aofai o aoga lau Afioga e selau onovalu. E le o tuua i tua aoga ia e 48, o lo o ua i ai foi le galuega fuafua a le Matagaluega, ina ia faasopolia uma aoga a le atunuu. O lea o lo o ua galulue ai i lenei taimi i le School Connectivity, o se taimi ou

talanoa i le konekarate, aua e pei na o le pau lena o le vaega sa sausaunoa i ai nisi o sui usufono. Ae i le tulaga ua i ai lau Afioga i le Fofoga Fetalai, o lo o ua faatuina foi le task force mo le School Connectivity lava lenei. E le gata ina ia lelei le connection, ia aua, aua, aua ne i toe motusia le connectivity a aoga, ia tapena standards talafeagai mo faleaoga uma lava e ao ona fausia, ia i ai i totonu ma le fesootaiga. E le gata i lea a ia saili seleni ma saili resources e faatupe ai ma faatino galuega nei. O i latou o lo o i totonu o le task force o le Matagaluega o Aoga ma le Matagaluega o Fesootaiga, sau se taimi ona auai mai lea ma le Matagaluega o Tupe i se taimi talafeagai.

Lau Afioga i le Fofoga Fetalai, ona ou oo mai lea i le tulaga i le konekarate e pei ona taua. O le mea manino lau Afioga, e le itiiti faafituli sa i ai i le tatou School Connectivity, e le o le connectivity le faafitauli. O le faafitauli lau Afioga, o equipments sa faaaoga, aemaise o le tele o isi aoga, e le o mafai ona meet le connectivity o lo o avatu, ma le manaoga o aoga. O le ala la lea sa faaaoga ai la tatou satellite ona o tulaga i manaoga o aoga. A faaaoga le tatou microwave e pei ona silafia e le Maota, e ao ona connect ma toe fai ia network i totonu o aoga, toso le uaea, koneti uma aoga. Tatou Kolisi e tatau ona koneti uma potuaoga taitasi, faatasi ai ma le library ma le Ofisa o le pule. O lona uiga e manaomia le internal network a le aoga. A oo i a tatou Primary Schools, e manaomia ona koneti le Ofisa o le Pule, o faiaoga ma le library ma nai potuaoga, po o le Year 8, Year 7, Year 6. E pei o le uiga lena e eseese uma manaoga o aoga, e le mafai ona faamalieina manaoga o aoga taitasi, i le tatou tupe itiiti lea sa i ai.

Lau Afioga i le Fofoga Fetalai, a tatou saili i le tulaga lena, o lona uiga e toe tagi atu foi lenei Matagaluega i se isi tupe tele. Ae peitai o le faaaogaina o satellite o le a mafai ona fai ai le WiFi i le aoga atoa. O fea lava le potuaoga e te i ai, e faaaogaina mai i ina. E pei o le agaga lena lau afioga, o lea sa i ai le tofa i le Kapeneta, ina ia faaaoga tatou satellite, as an immediate solution, e foia ai le tele o faafitauli o lo o i ai. I le tulaga o le konekarate, faafetai... o i ou te manatua ai lava, atonu o le taua lea o auunaga o Ofisa Sili o Pulega a Matagaluega, o le faafogafoga totoa i saunoaga a le Maota.

E manatua ai lava le lauga a se tasi o Minisita o le Maota o si o matou itumalo i Fagaloa. E talanoa loa le sui usufono i le tulaga o togafitiga faafomai ma le tulaga o vailaau ma tulaga faapena, ona faapea lea, o lo o avanoa lava le Iunivesite i fafo e aoga ai faafomai. E i ai le talitonuga a manino lava tulaga o se faafitauli, e faafaigofie ai foi ona malamalama. O le tulaga na i ai le konekarate, e pei lava ona silafia, o le agai mai o le Faigamalo, o le tasi lea o toatuga sa i ai, o le le auau o le connectivity sa i ai. Sa faatino ai le galuega a le Vaega Faapufai i lena taimi, ina ia faapipii uma ia satellite nei i luga o tatou aoga. Ae peitai, sa i ai le tofa a le Kapeneta e toe tatala ese. O le tulaga lea na i ai, o le toe tatala ma toe faapipii i luga, e masalo o lea e silafia e... a e alu atu e avatu se mea fou e faapipii, e alu atu lava faapipii e faigofie, ae o le toe tatala la lea i lalo ma toe faapipii i luga, o

i ina e i ai le faigata, o i ina e i ai le extra cost a le konekarate. E le mafai foi ona soona tuua i se isi konekarate le galuega, aua a sau le konekarate ma ana satellite, e te musu e sau le isi konekarate e faapipiii. Ona e tele ia... e alu atu le e faapipii, ae fai mai ua malepe. O le ala lea i le tulaga o le manage ina ma le va ma le konekarate ma taumafai ia lelei, ma aumai se tau taugofie, aemaise o le konekarate lea e i ai, e 12 masina lona vaaiga ma le maintenance.

O le ala lea lau Afioga i le Fofoga Fetalai, o le agaga lena, ina ia silasila totoa, faasoaso tatau i le tulaga o i ai...ia aua ne i i ai nisi extra cost variations e tele, mo tatou konekarate ma le agaga faaaloalo.

Ona manatu la i lenei taimi, o lo o ua tapuai ma le agaga faaaloalo i le konekarate ma le latou galuega, aemaise o le Matagaluega o Aoga ma le latou Matagaluega, ina ia faamaea i se taimi vave a tatou aoga. O le faamoemoega ina ia faatino, i a i ai fesootaiga uma i totonu o tatou aoga e 168. O le tasi o Faiga Faavae lau Afioga i le Fofoga Fetalai...

Afioga Leana Ronnie Posini: Lau Afioga i le Fofoga Fetalai...

FOFOGA FETALAI: Ia onosai mai lava...sa e laga i lau lauga lau Afioga i le sui usufono.

Afioga Leana Ronnie Posini: Lau afioga i le Fofoga Fetalai e tasi lea mataupu na ou lauga ai o le konekarate lea. E faafetai tele lava i lau Afioga i le Minisita. Ua matua manino lava le folasaga a lau afioga, e auga lava le faamoemoe o lau afioga ona o le faaleleia o tatou aoga... E talitonu e le mafai ona oo i ai sou manatu i se taimi mulimuli, ona o galuega ia e faatino nei, e tali mai i le isi tolu i le fa tausaga. Ona ou faatoa tali lea, faaali ai lea o sou manatu. Ae o le tupe lava lea, le \$600,000 lea na taua e lau Afioga. Aua o le mea lena na ou musu ai... ae faalautele lou manatu, pe fia ni fale po o ni maota o faafeagaiga o lea e tatala mai satellite ia, toe ta sui. Aua o lea ou te vaai atu i le tupe lea e \$600,000, a faapea e luaselau ni satellite o lea o le a ta sui, ou te vaai atu i le pili i le tatalaina e tai \$3,000 e fua i le tupe lea. E na ona fesili atu i lau Afioga, ae pei o le uiga lea sa ou taua i lau lauga.

FOFOGA FETALAI: Ia faafetai. Lau Afioga i le Minisita.

Afioga Hon TOELUPE POUMULINUKU ONESEMO: Ia faafetai i lau Afioga,

Afioga Fepuleai Faasavalu Faimata Sua (Salega 1): E maua se avanoa lau afioga i le Fofoga fetalai.

FOFOGA FETALAI: Mo le faasaoina o lau Afioga i le Minisita. Tulai mai le sui usufono o Salega.

Afioga Fepuleai Faasavalu Faimata Sua: E faafetai mo le avanoa lau Afioga i le Fofoga Fetalai, o lea ua oo tonu lava le saunoaga a le Minisita i le vaega tonu lea sa ou taua i lau lauga. O le agaga faafetai lea ua mafai ona toe faaleleia fesootaiga lea i faleaoga o si ou itumalo. O fale uma lava o maota o faafeagaiga, na toe talai uma mai lava mea ia. O lea ua toe fesili le matou itumalo, po o ai i latou na taofia le faapipiina o mea i luga o faleaoga ae avatu i fale o faifeau. O lea la e matau atu i le saunoaga a le Minisita, fai mai o le Kapeneta. Po o ai la le Kapeneta lea na faasaina mea ia i luga o faleaoga a o lea foi ua toe faapipii. E faafetai i lau afioga i le Minisita i le faamalamalama, manuia le tatou usugafono.

FOFOGA FETALAI: Ia saunoa lau afioga i le Minisita.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, se i faamaea atu nai fesili ia.

Susuga Hon Laauli Leuatea Polataivao Fosi: Lau Afioga i le Fofoga Fetalai.

FOFOGA FETALAI: E leaga o lea ua tulai muamua mai le...se i tulai mail au Afioga i le Minisita

Susuga Hon Laauli Leuatea Polataivao Fosi: O le mea e faamalamalama i le saunoaga a le Minisita. E pei lava ona silafia, o le poloketi lenei, e le o se tamai poloketi. Ina ua latalata ua loloma le faaiuga o le tatou Nofoaiga lenei. I le naunau atu a lenei Vaega Faaupufai, e faataunuu le mea lea, o le fesoasoani i totonu o aoga uma a le atunuu. O lea ua saunoa malamalama le Minisita, o le tele o a tatou tupe na alu i le mea lea. E US\$20 miliona le isi poloketi, \$15 miliona le isi poloketi, US\$10 miliona le isi poloketi. E oo mai i le taimi lenei ua faigata ona faataavili. Ae ina ua tulai mai le Kamupani lenei lea tatou te vevesi ai, e na o le \$2,600,000 lea tatou te vevesi ai nei, e tau fesili po o fea e agai i ai. Ae o le mautupe na alu, e leai ma se mea na tupu, o lau molimau, leaga o au lea sa ou lauga e faapipii mea i luga o faleaoga uma lava o Savaii e onosefulu ma ona tupu. O le a le mea na tupu, na tala uma lava i lalo. Na tala uma i lalo ae aveese aua ne i faapipiia, se fesoasoani mo aoga a Samoa. Ona matou toe o lea toe talosaga i le nuu ma le komiti, faapefea ona fai. O la na talia e nuu ma itumalo, e ave i luga o fale o faafeagaiga. Ona matou omai lea tala mai luga o faleaoga, ae ave i luga o fale o faafeagaiga, se i maua pea le service lea. Aepeitai e le i gata i i, e uma ona faapipii i faleaoga, ae toe tapuni atu foi e le Matagaluega o Fesootaiga,

e aua ne i faaolaina, o le agaga lea. O lea ua outou faafofoga, o lea ua faasolo, o la ua faasolo mai Savaii, e toe ave uma mea sa i luga o fale o faifeau, ave i faleaoga. Ona faasolo mai lea i Apia, e valusefulu ma ona tupu aoga i Apia, e alu uma ai outou itumalo. O le mea lea na tatou vevesi ai, i le Nofoaiga lea ua uma nei, ua tea. Ae tatou silasila i le agaiga i le lumanai lea e saunoa i ai le Minisita. E oo atu i le faaiuga o le tausaga lenai, ua ola uma connectivity i aoga. Ma o le faamoemoe lena o le tatou Malo, o lea sa augani atu ai nei. Ae soia ia tatou te tilotilo laumata. E faapefea ona compare le \$2,600,000 lea e fai mai nei, ma le fia selau miliona na alu ae leai se mea na tupu. O lau tuualalo lena.

FOFOGA FETALAI: Ia malo faafetai, atonu e aoga foi le fesoasoani i le Minisita. O le tiute lava lea o le Malo, e faapena ona lagolago aua foi a latou Faiga Faavae. Se i saunoa mai le Afioga i le...

Tofa Hon Laufo Fonotoe Nuafesili Pierre Laufo: E leai ou te fia tuliloa le fesili lea sa ou fesili ai i lau lauga faalauaitete i le Afioga i le Minisita, i le tulaga...e le teena le taua o lenei atinae, o le matua taua lava. E pau le mea lea sa faafesili ai, o le procurement po o le award ina lea o konekarate, i le tender process. O tulaga o le tauofoga, e pei o le tulaga lea, o lea ua aumai le isi \$600,000, se i aumai sina faamalamalama a lau Afioga.,

FOFOGA FETALAI: Se i tulai mai lau Afioga i le Minisita.

Afioga Hon TOELUPE POUMULINUKU ONESEMO: Ia faafetai i sui usufono aemaise foi o le Sui Taitai o le tatou Itu Agai, aemaise foi o le Minisita o Faatoaga e fesoasoani i folasaga a lenei Matagaluega. Se i ou tali vave atu i le procurement, faafetai i lau Afioga, e pei lava ona tau faamanino atu i le taimi ua sola, o le tatou satellite ia, o satellite ua uma ona faapipii, a tuu la i se isi itu, ua uma ona engage i le Vaega Faaupufai a le FAST, i le taimi lena e toe faapipii. O lona uiga e relocate. O lea sa ou talosaga ai i le tenders board i le tulaga talafeagai, ina ia single source, o le uiga lea. E le fou i le tatou Malo le tulaga o le single source, ua ou manatua lava aemaise o nisi o suesuega sa i ai, o le tele o tatou lifi, e tele lava ina single source. E i ai foi le single source sa i ai le loli vai a le SLC i le isi vaitau, sa single source i lalo o...taimi sa i ai le RIC, ia e le afaina. O le agaga lena...

Tofa Hon Laufo Fonotoe Nuafesili Pierre Laufo: Lau Afioga i le Fofoga Fetalai o lea ua maua atu. Ua faafetai i le Minisita o lea ua maua atu le single source, ae o lea la ua award i le tulaga o le single source, a o lea e matau atu o lea e tele isi Kamupani, e le na o le tasi le source i totonu o le

atunuu. E tele isi Kamupani e mafai foi ona tauofo i le galuega lea ma le konekarate lea. E pei o le mafuaaga lea o le fesili faafetai.

FOFOGA FETALAI: Se i tulai mai lau Afiog i le Minisita o Galuega.

Tofa Hon Olo Fiti Afoa Vaai: E faafetai ona o le mataupu lea ua fesiligia ai le faaiuga a le Tenders Board. O lea e afio le Taitaifono, e ao ona tali atu. O le faamalamalama o le mataupu lenei, e pei ona malie i saunaoga, e le tasi se tulaga ua avatu ai mataupu faapenei faa-single source i totonu o le Komiti o Tauofoga. E fua la le tulaga lea i le availability i mea e faaoga i se poloketi. E le gata i lena a o kamupani foi e mafai ona latou faatinoina, i le capacity o kamupani. O le mataupu lea e laga nei, sa fua i le taimi vave i lalo o le tatou SOE, lea na aumai ai le faaiuga lea a le Kapeneta, e le gata i le faaiuga ua aumai e faatino ai, a o lea e i ai equipment, po o masini ia satellite a le isi kamupani lea ua mauaina le avanoa lea. Ona o lea ua i inei uma lava mea e faatino ai, e manatua o le taimi lena o le tatou lockdown, sa faatino aoga a le fanau, i luga online, i luga o internet. Ma o le ala tonu lea na faavavevave ai le faaiuga lea. Ona ave loa lea i le kamupani lea, o lea ua i ai uma equipment. A o isi kamupani e agavaa foi, a o le faalavelave, e i ai le taimi e faatali ai a latou oka, e faatino ai le mataupu lea i le faaogaina e fanau i aoga, i le taimi vave lea na tatou lockdown ai. O le tele lava o mataupu lau susuga i le Sui Taitai, o le mau anoano o single source, o a ea isi mau mea ua ma o atu o la e i ai, sa faatino uma lava i le tulaga lea, e pei ona faatino ai le mataupu lea. Ma le faaaloalo.

FOFOGA FETALAI: Malo faafetai...Ia

Tofa Hon Lauofo Fonotoe Nuafesili Pierre Lauofo: Ia faafetai i lau afioga i le Fofoga Fetalai, o lea ua tali mai le Minisita o Galuega, ae mafua ona tulituliloa, o lea foi ua malamalama. Ae mafua ona tulituliloa, ona pei lava sa ou vaai o faasalalau, tender. E le na o le tasi le na o le lua kamupani na tauofo, ae tele kamupani na tauofo. E pei o le mafuaaga lena, ua oso mai ua single source, ae tele kamupani ia pe afai e...o le tulaga lea lau Afioga i le Fofoga Fetalai.

FOFOGA FETALAI: O lea ua manino lou finagalo. O la ua saunoa manino le Minisita, o lea foi ua lagolago Minisita o le Kapeneta, ia o lea lava ua manino mea uma i la outou faafofoga. O lo o saili lava i auala taugofie ma faigofie ma talafeagai i na taimi. O le mea lea, o lea ua malamalama lea mataupu. Ia faaauau lau saunoaga see ese ma lea mataupu o lea ua malamalama.

Afioga Hon TOELUPE POUMULINUKU ONESEMO: E faafetai o le a ou see ese ma le mataupu e pei ona saunoa lau afioga i le Fofoga Fetalai.

Ona ou oo mai lea i le isi Faiga Faavae o le Faigamalo, e pei lava ona taumafai atu nisi o Minisita o le Kapeneta. A fua i le tualga lea e i ai i le taimi nei, o le tupe alu lava ia a le Malo i mea tau ICT Infrastructure Services, e latalata i le \$5 miliona i tausaga uma lava. O le tulaga lava ia o le SNPH e toeitiiti lava \$2 miliona. Ae le faitauina ai i totonu le tulaga i services o lo o faaaoga e le DMO, o le Vaai Tau, aemaise o Leoleo, Fui Mu. A tuu la i lona aotelega, e tele ia o le seleni o lo o alu. O le mea lea o lo o i ai le agaga o le Faigamalo e develop ai lona Faiga Faavae o le One Government ICT Platform. O le agaga o le vaega lea lau Afioga, e le gata ia faasaoina seleni i lana Infrastructure Services po o le toe tapue ai vaega e ono toe develop ai Infrastructure a le Malo, a o le aotelega i networks, le tulaga o systems, data centre ma mea faapena. A o le tele ia o seleni o lo o alu ai. E oo lava i tatou software o lo o faaaoga, e alu lava le Matagaluega ia. O le isi lea vaega o lo o tapena ai Faiga Faavae a le Malo, e tilotilo i vaega lea, e le gata ina faasaoina seleni lau afioga, ae ia tapue ai tatou local capacity. E pei lava ona silafia, e molimau lava i nisi o fonotaga na i ai, e leai se aoga tulou le Maota, o le lelei o le connectivity, tofua le tagata ma le telefoni, ae le o i ai le technology talafeagai e faaaogaina. O le mea foi lena, e pei ona sa maua i tausaga ua tuanai, sa talanoa lava i le tulaga lea o le e-economy. E fiafia lava e faailoa atu, o lo o i ai i totonu o le tatou atunuu le atamai i le tulaga lea, ae le o lelei tapue, faaleleia atili. O le masina talu ai, e le i mamao atu, sa fai ai le hakafone a le Pasefika, i le atunuu o Fiti. Sa auai atu ai tatou team pe tolu. E fiafia e faalauiloa, e tulaga muamua le team Samoa, tulaga lua le team Samoa. O le tulaga la lau afioga, o lona uiga o lo o i ai le atamai i lo tatou atunuu, ae le o lelei tapena ia tulaga ma Faiga Faavae ina ia lagolago le vaega lea. E le o mafai la ona tapue le vaega lea, pe a faapena ona pei e le o taoto i se lagatonu ma se tulaga e tasi, ia le tulaga tau ICT mo le lumanai.

O le ala lea lau afioga o lo o ua i ai le faamoemoe o le Malo, e tapenaina se taimi ona faalauiloa lea i lo tatou One Government ICT Platform.

Lau Afioga i le Fofoga Fetalai, o le isi Faiga Faavae ma Tulafono, ua silasila i le toe vaaia lelei o le tatou Policy Framework, e oo lava i le tulaga lea o le toe avatu i tua i service provider e vaaia le Infrastructure. O le isi lea vaega ua toe tilotilo le Faigamalo, i le tulaga talafeagai. E pei lava o le itu lea sa ou amata atu ai, silasila ia lelei le access ma ia taugofie. O le taimi lenei i le avatu atoa i tua o le vaaiga o le gateway, e le o i ai se tulaga tuusao, e mafai ai e le Malo ona silasila i le tau talafeagai mo tatou service provider, aemaise ai lau Afioga, ia le ave ai o se fesoasoani talafeagai a le Malo, mo tatou ISP laititi, ma tatou kamupani laititi lo o fia atiae. O le agaga lea lau afioga o lo o toe silasila ai le Malo i le vaaiga lautele, ma o tatou Faiga Faavae ma Policies mo le agai i luma.

E le o po se lilo o le isi vaega e ala ai ona tagai le Malo i le tulaga lea, e pei foi ona i ai le faamoemoe o le Malo i lenei taimi i tatou satellite, ona o le lesona lea sa maua mai Toga, aemaise o le lesona mai Manua. E aoga le Fabre e aoga le microway, ae a oo loa ina tutupu afa ma afatia tulaga faapena, e tatou te toe foi lava i le satellite. O le mea lea e ao ai ona i ai lava satellite e le gata mo fesootaiga i taimi faigata, ia aemaise foi o le taimi vave e ono manaomia ai. O le mea lea e pei o le isi vaega e tali atu ai i le tatou single source e le toe oo i ai se tala a lenei Matagaluega.

Ia e pei o se aotelega lea lau afioga i le Taitaifono, lau afioga i le Fofoga Fetalai mai i le itu o le tatou Matagaluega.

I le itu o le Ofisa o le Fono lau afioga, ia e na o le lua lava nai sui usufono sa saunua i lona aotelega lau afioga e pei ona saunua lau afioga i le taimi ua sola, i le tatou Induction Programme. Atonu o le isi lea vaega e ao ai ona toe faatino lelei le tatou Induction Programme, ia e pei ona saunua lau afioga na taua e le sui usufono o Faleata, le taua o lenei vaega. Ia aemaise foi o le faamanatu taua foi ia mo sui usufono uma.

Mo le silafia sa tapena le tatou Ofisa mo lea vaega, ae ona sa faatoa pasia le tatou Tala o le Tupe ia Setema, ia oo mai i le Kerisimasi, oo mai ia Koviti, ia o lea ua uma ia le Tausaga Faaletupe, ae o lea ua taoto le finagalo o le finagalo o lau afioga i le Fofoga Fetalai ma le Failautusi, ina ia toe tapena lea vaega e faamauina ai le finagalo o le afioga i le sui usufono.

Ia e pei foi ona fesiligia ia le tulaga o le tatou Separation, ia ma le tulaga i le tatou Constitutional Review. O le tatou Separation o lo o ua amata faagasolo ia galuega a le Konesale, ia o lo o fai le sailiiliga, finagalo foi ma manatu, e taoto mai se fautuaga talafeagai lau afioga i le Fofoga Fetalai ma le mamalu o le Fono, ia se faaiuga talafeagai mo le agai i luma o le Separation.

Ae i le tulaga o le tatou Constitutional Review, ia e pei lava ona ou fai atu, ia i le utiuti o le taimi o lo o tilotilo ia e faagasolo lava ia lea galuega, ia ae o lo o... i le lumanai. Lau afioga i le Fofoga Fetalai, ua maea ia... e pei o tulaga faapea, e ao ona... e na o tomai faapitoa. O tulaga tau loa, i lea vaega o lea ua uma ona fesootai i se tasi foi o paaga, a lo tatou Palemene, ia mo sona finagalo, ia ma amata ai ia le vaega taua. Ia e le o tuua i lalo ia lea galuega taua. Ae o le silasila a le faigamalo, e faatino ia nei vaega taua i lenei 60 tausaga talu ona tutoatasi lo tatou Malo.

Ia e pei o le aotelega lea lau afioga i le Fofoga Fetalai, e momoli atu ai le agaga faafetai. Lau afioga i le Fofoga Fetalai, o le avanoa foi o lenei itumalo, ia aua le usugafono i lenei taeao.

Faafetai tapuai a si ou itumalo, Afio o Alalagafa ma Lealaonofu, ia aemaise ia le Tauagaeseese ia Falealili. Faafetai foi i le sui usufono o Falealili Sasae, ia i le faaleoina o manaoga o le matou itumalo atoa i totonu o le Fono.

Ia e momoli foi le faafetai i totonu o Matagaluega o lo o matou galulue. Ia e le gata i lau afioga i le Failautusi o le Fono, aemaise foi ia Matagaluega o

Fesootaiga, ia aemaise o le Pule Faatonu, ia ma lau afioga ia Tupai ia mo galuega o lenei foi Tausaga Faaletupe ua tali uma.

Lau afioga i le Fofoga Fetalai e fia faaogaina lenei avanoa e faailoa ai i le mamalu o lenei Palemene, se tasi foi o Tapaau a o le tamalii foi o le tatou atunuu le afioga ia Lematua Gisa Fuatai Purcell. O lo o taumafai i le position o le Deputy Secretary General o le ITU, o le lala lea o le UN i le tulaga tau Tekonolosi. O le mea lea e momoli atu ai faamanuiaga ia ma le tatalo, ia saofaga le tatou mo faaalagamaea e le faigofie. Ua 135 tausaga o le UN e le i oo lava se Pasefika i le level lea. O le mea lea e taua ai e le gata mo le tatou atinae, ia aemaise foi ia le tatou atunuu.

Ou te manatua ai lava lau afioga i le Fofoga Fetalai le mea lea sa ou alu nei i ai aemaise... e pei lava o le filosofia i aso ia a le au colonial foi ia e agai mai i le Pasefika fai mai e divide and rule. O le Faigamalo a le FAST i lalo o le taitaiga a le Tamaitai Palemia, e tatou te galulue faatasi mo le manuia o si o tatou atunuu. O le agaga lea e tatalo ai, tatalo i le tatou Palemene e talosia le faamoemoe. O le tatalo foi lea i Ofisa Sili o Pulega o Matagaluega, ia vaai i tulaga faapea ia aua le manuia o si o tatou atunuu.

Faafetai i lau afioga i le Fofoga Fetalai, faafetai i le Susuga i le Taitai o le Itu Agai ma sui usufono ia aemaise foi o le afioga i le Sui Palemia. Talosia le afio mai o le afioga i le Palemia i lenei vaiaso, mamalu o le Kapeneta, sui usufono, manuia lenei aso.

FOFOGA FETALAI: Malo, faafetai. Ia malo saunoa lau afioga i le Minista o Fesootaiga, ia aemaise foi o le Maota Fono ia malo lava faafetai mo le tofa faaalua. Ia aemaise foi o le manino o le tele o mea sa laga e sui usufono mamalu o le Maota, o lea ua manino mea uma i le faafofogaaga, e le gata o sui usufono mamalu, ia faapea foi le Maota ma le faafogafoga mai o le atunuu.

Ia malo lava galue, faafetai foi i tou Matagaluega o lo o outou galulue faatasi, ia aua lava le tautuaina ma le manuia auiluma o le tatou atunuu. O le mea lea, malo le galulue, faafetai foi mo le lauga ia ua i ai i lenei aso i le taumafaiga o le tatou Tala i le Tupe. O le mea lea malo faafetai.

Ia ua oo mai le faasologa i lau afioga i le Minisita o Aoga, ia tulai maia lau afioga i le Minisita o Aoga.

Afioga Hon SEUULA IOANE (Minisita mo Aoga, Taaloga ma Aganuu): Lau afioga i le Fofoga o le Fono, ou te piitia le itula ua sola sa fai ai oe ma ositaulaga o lenei Maota.

E faaluaina ia le agaga faafetai i le Atua. E faataua e lou sui usufono le Faavae o le tatou Malo. O le Atua le Tama, le Atua le Alo ma le Atua le Agaga Paia. O le Atua o Aperamo, le Atua o Isaako, le Atua o Iakopo. Ia ona tuutuulima mai lea o ana Afioga Paia i Perofeta, seia oo lava ina Afio mai le Agaga Paia ma aumai le auaposeitolo, ua oo mai le feau i le aufai

misionare, ua oo mai i ai tatou, ua fai ai Samoa ma Lona nuu. Ae fai le Atua ma nuu o Samoa.

Lau afioga i le Fofoga Fetalai, ou te iloa ua toe o ni nai aso ona faamaea lea o le Tala o le Tupe 2021/2022. Ou te manatu, o le Matagaluega o Aoga, Taaloga ma Aganuu, o le tatou Iunivesite Aoa o Samoa, o le Matagaluega o Faailoga Taualoga, e le laitiiti lea Matagaluega. O le Matagaluega e aofia ai uma Samoa. O le mea lea, ae le i faia se tala i le Tala o le Tupe 2022/2023, ou te fia momoli le agaga faafetai.

Ou te faafetai i le Matagaluega o Aoga, Taaloga ma Aganuu i le susu o Ofisa Sili Lagolago, aemaise o Sui Pule Sili, maave eseese o le Matagaluega i lo outou fitaituga i le faataunuina o tatou tiute ma o tatou faiva. Susuga i Asiasi Aoga, aemaise o Pule Aoga, ma Faiaoga, faafetai. Malo le galulue.

Ou te faafetai foi i Matagaluega uma a le Malo, aua e i ai lou talitonuga, e le i misi sa outou sao, ma togi sa outou maa i lenei Matagaluega i soo se auala. E le galo ia te au le auavefua a si o tatou atunuu i taaloga, mai i le lakapi o le soka, netipolo, so o se taaloga o aafia ai le Matagaluega o Taaloga ma Aganuu faafetai. Malo fai o le faiva ua le ole lea.

Matua, e le mafai foi ona taunuu le miti a le Matagaluega pe ana leai lo outou lagolago mai. Momoli tamaiti i le aoga, tapena lavalava o fanau, fafaga seia oo lava ina faataunuina lo outou faamoemoe, faafetai, faafetai lava.

E le galo foi le fia faafetai i le Aiga Sa Levi i la outou foi pitolaau ma lo outou galulue punouai, e tatalo mo fanau ia sefe fanau i luga o auala, faasaina lo latou ola a o feoai i aoaoga i lea aso ma lea aso, faafetai fai tatalo, faamanuia le Atua.

Ou te fia faafetai foi i Kamupani eseese o e o lo o faia le tiute o le lauina mai o oloa aoga i aoaoga, taaloga aemaise le faatinoina o aganuu. E pei o le Kamupania a le SABB, o le BSL, ia ma le tele o isi Kamupani i totonu o le tatou atunuu, o lo o fai ia so latou sao taua, i le atinaeina o aoaoga, i totonu o le Malo, le Ekalesia, Aoga Tumaoti. Faafetai, faafetai lava.

O le tautua a nai o tatou aiga mai i atunuu mamao, lafo mai le tupe, lafo mai faamanuiaga, aumai oloa e fesoasoani i aoga, aemaise o le faatupeina o tiute ma faiva o aoaoga i totonu o Samoa. Malo, faafetai le tautua, faamanuia le Atua i a outou faiva alofilima.

I le tausaga faaletupe 2022 i le 2023, fai mai lona manulauti, folau i le faatuatua e faamaite atinae mo le tamaoiga. O le upu ou te fia faamamafaina e fai ma au matua, faamaite. Lau afioga i le Fofoga Fetalai, o lou talitonuga, o le upu faamaite o se isi gaiioiga po o se isi faiga i luga o atu o Faiga Faave po o faiga ua masani ai, faamaite. O lea ua taatia nei ia le Tala o le Tupe, faafetai i le Minisita o Tupe ma le Matagaluega ua faataatia o mea lava ia e masani ai ia le Tausaga Faaletupe i tausaga uma. O se isi taimi ua ae i luga o se mauga. O se isi taimi ia ua pau i lalo e fua lava i mea e tutupu i le aso. Peitai o le ogatotonu o le Tala o le Tupe, faamaite, faamaite. O lona uiga o

lo o taatia i totonu o lenei fuaitau, e i ai nisi galuega e ono tapena i ai le Matagaluega, e ono aafia ai le lelei o le tamaoaiga e pei ona o tatou molimauina i lenei taimi.

E tele isi Matagaluega a le Malo ua ta vaai atu ia ua faamaite nisi mea fou. E tai pei o le Uluai Seleselega, ia e tai pei foi o le Matagaluega o Tina ma Tamaitai, faamaite. E ui lava o mea ua masani ai le soifuaga, ae tapena nisi mea e sili atu, mo le atinae o si o tatou atunuu.

E le o po i malae, le aafiaga o le atunuu i le faamai, fesuiaiga o le tau, vavatau atunuu o le lalolagi. Ua aafia foi i saunoaga a nisi sui usufono, pe faamata e le o le iuga lea o le lalolagi ua oo mai? Ia ae faafetai, o lea lava e logologo i tatou puialii, ina ia tatou tapena, ia tatou sauni aua ne i faapoia i ofaga lo outou aofia ia ma le tatou atunuu ina ia o tatou savavali, folau i le faatuatua fesoasoani mai le Atua i auala uma.

Ou te fia faafetai tele lava i le mamalu o lenei usugafono, aua o la outou faatofalaiga ma finagalo na opea nei i le Maota, ua fai ma auau, po ua matimati ai tapenaga a le Ofisa o Aoga. E i ai lou talitonuga, e le mafai ona fai toatasi ma e le mafai ona tele ni figota e maua pe a aunoa ma le tatou sulu tele. O le mea lea ou te faamalo ma faafetai atu ai i o outou paia ma lo outou mamalu.

Se i fai sina tala i nai vaega ia ua aafia i lauga o lenei Maota. O mataupu masani lava e masani ona tagofia e le Maota o le itu tau faleaoga. Ioe e sao lelei. Ma e ou te fia faafetai ai foi i le mamalu o Alii ma Faipule, i nuu taitasi ma afioaga, aua o le latou matafaioi lea, o le fauina o faleaoga. Ua nao sina pasene laitiiti o lo o galulue ai le Matagaluega o Aoga, o le faafaiaogaina ma tusi aoga, a o le lautele ma le tele o le galuega, o lo o lafo ma pau atu lava i aao o le tatou itumalo i nuu taitasi, faafetai, faamalo.

O le tapenapenaga o nei mea o faleaoga, e mafai ona faapotopoto se nuu, tilofia ma latou iloiloaina, po ua lava ma agavaa se numera e ono fai ai se faleaoga fou. Afai ua autasi ma taatia i lagatonu lea faamoemoe, ona tapena lea o se talosaga, e aumai i le Matagaluega. Se i tilotilo foi le Matagaluega po o lava ia ni faiaoga, e ono faafaiaogaina lea faleaoga fou, ia aemaise foi o mea o tusi aoga. O le nuu lava la po o le afioaga, o latou e tapenaina se latou tusi, ma lagolago e le Matagaluega ia tatou paaga masani, Saina, Iapani, Amerika e faatupeina ia lea faamoemoe.

E i ai ni talosaga na faapea pe fia fai ni tatou TVET i i i le itu Asau ma Salega. Mo le silafia e lenei Maota mamalu, masalo pe 3 vaiaso talu ai, sa fai ai se laugatogi a Kolisi uma o le Malo, Ekalesia ma Kolisi Tumaoti, mo le mataupu lea tau TVET Online, sa fai ai. O lona uiga o lea ua faatotoga uma lava Kolisi i le taimi nei i faiaoga ua aoaoina faapitoa e momoli le TVET i tamaiti aoga. Ia e i ai foi lava le talitonuga e le atoa uma ia ni ia i se liu o se vaa, a la ua amata.

O la ua i le Polokalame a le NUS ma le APTC le aoaoina o tama, alo ma fanau a si o tatou atunuu, ina ia iu atu ma o atu e faiaoga i tua i Kolisi, o i ai

se poto po o se agavaa e latou te faataunuu ai le faamoemoe lea i aoga. E le tele ni TVET i si o tatou atunuu. O Savaii ia e pei e na o Salelologa, Satupaitea ia ma le Ekalesia o Aupaia o Aso e Gata Ai. Ia ae o le manaoga lena ma le faamoemoe foi lena e faalatele lea mataupu a lea ua amatamea le Ofisa o Aoga, lea ua tapena ia faiaoga, mo le TVET.

Ou te fiafia e faailoa atu, sa ou i ai i le laugatogi lea, e sili ia le tamaitiiti mai i le Kolisi o Asau i le tusigatala essay o le Tausaga 12, toe sili i le tusigatala o le Tausaga 13. Vaai la i ai, ua leva ona i ai le TVET i tua. O lona uiga, e toe pau lava le mea lea e totoe, toe o le fau o se faleaoga lelei, ia ma faataunuu loa lea faamoemoe. Ae taatia mai lo oulua finagalo, ia sui usufono, o lea ua tilotilo foi i ai le Matagaluega i se isi vaega o tatou motu o Savaii po o Upolu nei, e ono faatu ai ia se tatou TVET.

E 3 ia Tulagalua i i i le itumalo lea o Faleata 1, e 3. E 3 Aoga Tumaoti la e i ai. O lona uiga ua 6, ia ma le isi foi aoga na e i ai, e 7 lelei ai ia Tulagalua i i i Faleata 1. I le tilotilo a le Matagaluega, ua lava ma totoe ia aoga mo le itumalo lea.

O le mafuaaga e ala ai ona tumutumu aoga, o le tele o tatou nei e faigaluega i le taulaga, e omai mai i tua i nuu mamao ia e i tua a tatou. O le tele o tamaiti, e omai uma aoga i inei. O le mea ua tupu i aoga a tatou ia i tua, ua maua loa la i le mea e tau o le 60 tamaiti, 70 tamaiti. E i ai foi le isi aoga, 36 tamaiti. O lona uiga a faataatia i fuafuaga Faavae a le Matagaluega i le ratio lea e i ai e 30 tamaiti i le faiaoga e toatasi, ou te faamalie atu, ua na o le toa 2 ni faiaoga e agavaa i le aoga lea. Afai e 70, o lona uiga e toalua faiaoga i le 60, ma tamaiti e 10 na e totoe ai, ona avatu lea i ai o se isi faiaoga, e toa 3 ai faiaoga. O Faiga Faavae na a le Matagaluega peitai, e aoao uma mataupu, e tataua ona aoao uma mataupu e 8 lelei vasega e aoao ai. O le ala na o le lagona o le siuleo lea, sioki faiaoga, sioki faiaoga, sioki faiaoga.

O lo o i ai foi Faiga Faavae a le Matagaluega i Aoga tetele ia e i inei i le taulaga, ua tau tuu i lalo le numera ua lava le 750 ae toe faafoi uma ia tamaiti mamao lea e i ai, e o e aoga i o latou itumalo ma atinae o latou itumalo. O le mea lea e vaaia, e mautinoa e malaga mai loa le aufaigaluega mo galuega o le vaiaso, e omai lava ma aumai uma tamaiti, e aoga i inei, tumu ai aoga a le taulaga. Ua le mafai ua laiti potu aoga ae o la e tetele lava potu i o tatou aoga ...

Tofa Manuleleua Paletasala T Tovale: Lau afioga i le Fofoga Fetalai, na o sina minute lava se i...

FOFOGA FETALAI: Malie ia lau afioga i le Minisita se i tuu atu le avanoa i le sui usufono o Faleata 1.

Tofa Manuleleua Paletasala T Tovale: Leaga o lea ua oo tonu lava le saunoaga a le afioga i le Minisita i le tulaga lea na ou lauga ai foi i lou itumalo.

Mo se mea e fia faasao e le 3 ni Primary Schools e na o le 2. Ia o le mea tonu lava lena lea na ou talanoa atu ai i le le lava. E na o le 2 lava e na o Vaimoso Primary School ma Lepea Primary School. O le tele o isi aoga o Aoga Tumaoti. Ae o le tulaga e pei ona e saunoa ai i le tulaga o le omai o matua ma aumai tamaiti, o le tele o aiga ia ua faatau motu ia o latou eleele ma o latou fanua i totonu o lou itumalo. E le mafai la ona toe o i tua po o Savaii i... leaga o lea ua faatau o latou fanua. Lea ua nonofomau ai ma faaoga ai ia latou fanau.

O le ala lea ua ala ai ona faatupulaia ia le fuainumera o tamaiti aoga i aoga ia e i totonu o lou itumalo. Ma le faaaloalo.

FOFOGA FETALAI: Ia, lau afioga i le Minisita.

Afioga Hon SEUULA IOANE: Malo faafetai, manatua foi, fai mai le Sini Autu o le anavatau o le Tupe i le taimi nei, faamaite, faamaite. Sui se isi mea. O Faiga Faavae lava ia lea ou te tautala atu ai ma o lea ou te tautala faalauaitele ina ia sefe ai foi isi finagalo na manaomia foi e i latou se faamalamalamaga i mea tau aoga. Ia ae o lena faataatiaga a le Matagaluega lea e i ai.

Ae a faapea e silasila ane lava e lava foi nisi tamaiti e ono fai ai se isi Aoga Tulagalua, ia o le a taatia atu i lau afioga i le sui usufono, fai se tou Kulupu, fai se tou tusi, tusi loa ia Mr Keisuke i o Iapani, e faatupe mai ia le tou faleaoga. Ia o le faleaoga o Lepea, o la e i luga nei o le laulau... O le tala foi lea sa fai talu ai i le faleaoga o Lepea, o la ua tapena ia le Malo o Saina, ia latou te faatupeina ia le faleaoga o Lepea.

O nisi finagalo na aumai i malaetaalo. Ia e 2 ia aoga ia ua faamanuiaina i le taimi lena i malaetaalo. O le Aoga lea mai Falealili ia ma se Aoga mai i Savaii. Ia o nai sene lava na totoe i le muli o le ola, ia o lea ua fesoasoani i nai aoga ia. Ia ae ou te iloa, e faalava ifo e latou aua e le taitai lava ai ia ni malaetaalo i ia tupe na maua nei. O le matupu i...

Tofa Hon Olo Fiti Afoa Vaai: Lau afioga i le Fofoga Fetalai...

FOFOGA FETALAI: Malie lau afioga i le Minisita o Aoga se i tuu atu i le faauilavea a le Minisita o Galuega...

Tofa Hon Olo Fiti Afoa Vaai: Se i ou fesili atu lava i le Minisita po o ai aoga ia ua toe faamanuiaina aua o lea ua o tatou iloa le isi 6.

FOFOGA FETALAI: Ia lau afioga i le Minisita.

Afioga Hon SEUULA IOANE: Ia faafetai, e oo atu lava ia le faasoa. E le uma ai ia le faiaso o le Alii. E tatou te talanoa lava i mea i le taimi lenei. Ae faafetai lava mo le faamanatu mai. A e manao ai? Ia fai le tusi talosaga, momoli i gauta i le Ofisa, ia faasoasoa mai e le Ofisa pe o ai e pito i luga, ia a o ai foi e faapito i lalo.

O le faafetai tele lava i finagalo na faailoa mai ia le Vasega lea o Asiasi Aoga. Ou te matauina o le faalua lea na momoli mai e le sui usufono lea le taua tele foi o lea foi tofiga. E mamao le nonofo atu a le Matagaluega i inei, peitai o nai tamalii nei o lo o fai ma aao o le Matagaluega, e latou te tilofia ia galuega a faiaoga i itumalo taitasi. Peitai, o le atugaluega, e tolaiti i latou, ae tetele itumalo. O le mea lea, ua i ai le manatu o le Matagaluega, e toa 5 nisi Asiasi Aoga fou, ia o lea ua tapena nei mo le galuega lea. O le a tuuina tu foi i ai latou o pulea totogi o tagata faigaluega, ia se i tilotilo i le vaega lea, pe le ono siitia se pasene o totogi o nai Asiasi Aoga.

O le mataupu lea i totogi, faafetai foi, faafetai tele mo le finagalo faailoa. I le Aoga Tumaoti ma aoga Ekalesia, i lalo o le OGG, o lea ua avatu i ai le 60% e tapena e fesoasoani i totogi o faiaoga ia. Ae faataatia le 40% o latou tupe e tuuina atu, e faagaioi ai ia aoga a latou. Peitai o le Malo ia, o lea lava e i lalo o Faiga Faavae a le Malo, ma e taatia foi ia se i talanoaina foi e le Komiti o Totogi o Tagata Faigaluega a le Malo, ia ona tilofia foi lea o le itu lea.

O le tatou Iunivesite Aoa o Samoa, sa laga e se sui usufono le finagalo lea o le online mai o a tatou Registration lea sa amata i le amataga o le tausaga. Ia ou te iloa e le o po se lilo i lenei Maota mamalu, i le amataga o le tausaga ae feagai tatou i le faataumuaava atu i faamai, ia ma ua afaina ai le fegasoloai ma le tapenaga o le aega o aoga. Na faafuasei le mea lea na tupu peitai, ia ona amata loa lea ona fai ia le online registration a le Iunivesite. Ia e sao lelei le finagalo e le i iloga ona atoatoa lelei peitai, ua gaii e sili atu i lo le leai o se mea e faia, ona o le taimi na lockdown ai ia le tatou atunuu. Ia o lea lava ua toe faataatia i ona tulaga tulelei, ma ua aoga foi le mea lea na tupu muamua, e tapena ai le Iunivesite, a toe tupu mai se mea, ia ua lava sauni latou i faamoemoega uma.

E sao lelei ia le saunoaga i le Registration Fee lea e masani ona fai. E faalua ona lesitala i le Semester muamua, \$322.00, Semster lona 2, \$200.00 ua pau, ona e mafua mai, o le Semester muamua, o i ina faatoa lesitala ai le tele o tamaiti o le aoga. E i ai le package lona e faatatau tonu lava i tamaiti e te alu ma ave lau package lona, tasi foi la lona vaega. E i ai foi le vaega o mea e tau o fee o latou organization a tamaiti aoga, ia lea foi la e i totonu lava o le vaega lea, aemaise lava o le faatupega ma le tapenaina o mea mo le resitalaina ina ia aoga ma taua mo latou.

O si tusi lea sa faailoa mai e fai si laitiiti tele, peitai, i totonu lava o le Iunivesite ia, o se tusi sili lea ona taua, aua o le tusi lea o le kalena lea faa-Iunivesite e i ai uma lava i totonu ana polokalame ma fuafuaga mo le tausaga

atoa. O lona uiga, e taua tele. Atonu foi o lea e laitiiti le tusi ona e taumafai ina ia laitiiti e faigofie ona feaveai, ae o information la e i totonu, o ni information taua e tatau ona keep lelei e le tamaitiiti, e tatau ona teu lelei ma e le tatau ona afaina gofie i le tau. O le ala lea e fai ai si taugata. Ae o lea lava ua lagona mai foi e le Iunivesite ia fuafuaga, e taatia atu i sa a latou fuafuaga mo ia faamoemoega lelei. E pei lava foi ona ou fai atu i le taimi ua sola, o le 5 ai lenei o tausaga e le i toe tapenaina se suiga o tatou pili.

Afioga Leana Ronnie Posini (Safata 1): Lau Afioga i le Fofoga Fetalai...

FOFOGA FETALAI: Malie lau Afioga i le Minisita se i tuu atu le avanoa i le sui usufono mamalu mai Safata 1, sa taua i lau lauga.

Afioga Leana Ronnie Posini: Faafetai tele lava. O lea sa taua i lau lauga. Faafetai tele lava i lau Afioga i le Minisita. Faafetai i le malamalama ma manino o le folasaga a lau Afioga. E leai foi se agaga e tau faalavelave i le folasaga a lau Afioga. O le mea lea ua oo i ai o le mea lea o le kalena sa ou taua. E sao lelei lava lau Afioga, e toetiiti lava maua le 30+ o itulau. A ou faitau ai, ia na o se 30 itulau o le kalena lea e i ai uma Tulafono, pe na o se 30 lava itulau e manaomia e le tama aoga po o le teine aoga o lo o i ai Tulafono o lo o i ai ma le polokalame e fia malamalama ai i polokalame o lo o fia aoga ai. Aua e pei ou te iloa e 100+ le tau lava o le kalena lea, ia pei o se agaga foi lele o le faamama avega i nai o tatou aiga i le totogiina o le resitala lea ona o le kalena lea. Ma le agaga faaaloalo.

FOFOGA FETALAI: Ia mo le faasaoina o le taimi o lau Afioga i le Minisita, se i tulai mai lau Afioga i le sui usufono o Sagaga 1.

Afioga Hon Loau Solamalemalo Keneti Sio (Sagaga 1): Lau Afioga i le Fofoga Fetalai, faafetai mo le avanoa. E le fia faalavelaveina foi le saunoaga matagofie a le Afioga i le Minisita, ua faitau foi ma le totoa i le malamalama o lana saunoaga mai lava i le amataga. Ae o au na faapena foi ona ou talanoa i nisi foi o fuafuaga e tusa ai ma totogi, aemaise foi o le TVET e pei ona faamanino mai. Ae faafetai lava i lau Afioga, e matau atu o lo o mulimulitaia lava e le Matagaluega foi faiga faavae a lena foi Faigamalo ua tuanai atu i tulaga ia ina ia... leaga o la e i ai foi tala salatua e pei ua foliga mai e le o fiafia i ai, aemaise lava aoga a nisi o Ekalesia e le o Ekalesia uma, i le tulaga lea o TVET. A o lea la ua faamanino mai e le Afioga i le Minisita le taua, ma o la e foi e mulimulitai i ai i taiala. E pei foi o totogi pei foi ona ou talanoa atu ai i le taimi na ou lauga ai, ona o le aoga faataitai fa tausaga, o lea foi ua faatulafonoina. Lau Afioga i le Minisita, e tatau ona i ai le fa tausaga i totonu o aoga i le taimi lenei, ma ua uma ona faatulafonoina. A o le fesili la, pe

faapefea totogi o faiaoga e aoaoina alo ma fanau ia. O lea foi e maua atu le OGG e pei ona i ai le fesoasoani a le tatou Malo i le 60% ae le auau lau Afioga i lau lea matau, ae o lena e i ina le uta i lau Afioga ma le paia o le Matagaluega, ina ia manino ma faapena ona mafai ona aotauina alo ma fanau fa tausaga ona ua maea ona faatulafonoina i lalo o le tatou Matagaluega. Ma le agaga faaaloalo.

FOFOGA FETALAI: Malo faafetai. Faaiu mai le saunoaga a lau Afioga i le Minisita.

Afioga Hon SEUULA IOANE: Ia, faafetai i lau Afioga i le Fofoga Fetalai mo le avanoa. Faafetai foi i le sui usufono mai Safata mo le faamalamalamaina o ia itu. Ia, e sao lelei lava, o le agaga lava lena, a faapea ua fia sefulu nei tausaga o le tatou Iunivesite o tatou tilotilo lava i lea tusi mafafia, o le faamaite. A faapea o la e tilotilo atu i totonu e leai ni mea aoga tele o i ai, manaia le finagalo, ua tatau ona tipi faalaitiiti i lalo. Ia faafetai foi i le fesoasoani mai a le Afioga ia Hon Loau, e le fou i lau Afioga le mataupu lenei Loau ua leva ona e saofai ai, ae faafetai tele lava i lou fesoasoani mai. Ou te manatu o le a fai le mea lea e te finagalo ai, aua o mea uma lava, o tatou uma lava, o a lagona, o a tiute, o le tatou faiva lea, tatou te lafo aso faatasi aua le lelei o si o tatou atunuu. Faafetai.

Ona ou oo mai lea i le pili aoga o le Iunivesite. Ia, ou te nofo i lalo o tau fai atu sina folasaga, o le lima ai lenei o tausaga talu e le i toe siia le pili, pili aoga. Ae o le Semester 2 i le tausaga na tea nei na amata ai ona faapau i le lalo le 5% o le pili. O i ai nai vaega o lo o fesoasoani mo matua. Manatua foi e uma loa le resitala pe lua masina e tuu mai ai le avanoa e le Pulega a le Iunivesite e totogi uma ai le pili o le tamaitiiti aoga. A o le fuafuaga lea ua faataatia e le Iunivesite i le taimi lenei, ua tatala le avanoa e faatele ai se piriota e togitogi atu ai le pili i lea taimi ma lea taimi. E faagata tonu lava i le vaiaso ae suega loa o le Semester le isi vaiaso. Lona uiga, ua umi lava le avanoa. Peitai, e tatau ona o atu matua e fai se latou feiloaiga ma le administration, ia ma fetuunai pe fia se tupe e gafatia e matua i lea taimi i lea taimi e togitogi ai le pili. Tasi lena faamamaavega a le tatou Iunivesite. Ia manatua foi a outou Afioga, that's university level. E moni lava tatou te manatu i le taugata o le soifuaga ma tatou vaavaai i ai, ae o le ausiaga lena o mea tau Iunivesite ina ia iu mai foi tamaiti o lo o aoaoina e anoa ma agavaa i tomai e tatau e pei ona taugata le totogiina ma le latou aoga o lo o fai. Ou te iloa foi, o se isi lea luitau i tamaiti aoga, aua e alu le tamaitiiti aoga e aoga i le Iunivesite ma lona mafaufau, talofa e i le le lava ma le utiuti o le faasoaa a nai ou matua, ou te vaai e tai telefoni i aso uma, sue se tupe e fai ai le pili. O le avanoa lea e nofo ai i lalo ma tilotilo, fai faalelei meaaoga. E le tatau ona toe tafaovale ma toe tia i le aoga, a o le mea lava lea e tatau ona fai.

FOFOGA FETALAI: Ou te faamalulu atu i lau Afioga i le Minisita, ia e talu ai o lea ua tatou taunuu mai i le taimi e malolo ai le tatou galuega i lenei aoauli, e tusa foi o le lafo ua faamaonia. O le a faaauau lau saunoaga pe a tatou taliu mai i le afiafi a nanei.

Ua tapena le tatou taumafataga o le aoauli tatou te sailiili malosi ai mo le faaauauina o le tatou galuega nanei.

Ou te faasilasila atu ua faataatiaese nei Taulumaga a le Fono Aoao Faitulafono seia aulia le itula e 6:00 i le afiafi a nanei.

Na faataatiaese Taulumaga a le Fono Aoao Faitulafono i le itula e 1:01 i le afiafi.